

Ihiẹn Jizos' Kraịstị Ghosị Jọnu Nghosị

¹ Ihiẹn Jizosị Kraịstị ghosị igbon ẹ wu Jọnu ya rị ime ẹhụhụonị. Osolobue we ihiẹn ndinị ye Jizosị, keni o we wẹ ghosị ndi igbon ẹ—nị wẹ hun uzọ marin ihiẹn ndi jenko d'e me ẹgwa. Kraịstị nọ zi mmọn-ozị ẹ jenni odibo ẹ wu Jọnu d'a ghosị a ya, keni ọ gha ẹka Jọnu ghosị ndi igbon ẹ ya.

² Jọnu a shiaguọ nwan ẹri banyeni oku Osolobue lẹ ihiẹn Jizos' Kraịstị ku; ọ shiaguọ ẹri ihiẹn ile ọ hun.

³ Ngozi ya rinị onye ọwule k'a gunpūhanị ibe ẹ ihiẹn ndi rị ime amumanị; ngozi ya rizikwo nị ndi hun k'a nun'a lẹ ndi hun k'e me ihiẹn wẹ de ime ẹ—makeni ogen ihiẹn ndinị e gi me a riguo nsue.

Jọnu E Kele Uka Eisa Ndi Hu Rị Azuun Eshia

⁴ Jọnu de ẹhụhụonị jenni uka esa ndi hu rị Azuun Eshia.

Efoma lẹ udon hun gha ẹka Osolobue, onye ahun rị kikenni, hun rị mbu, hun lalanị bia ya rinị onu—efoma lẹ udon hun gha ẹka ya lẹ Mmọn esa hun rị ihun ukpo ẹ

⁵ lẹ Jizos' Kraịstị bia.

Jizosị Kraịstị, hun wu osheri ahun furu wẹ gi e don ẹnya, onye ibuzo gha onwun lihi, onye hun a ki ndi-nze rị elu-ụwa.

Qgho lẹ okiki ya wuru nke Jizosị Kraịstị, onye hun nwe ihiẹn-osusuo ẹnyi, gi edeke ẹ gbapuha ẹnyi ẹka njọ ẹnyi;

⁶ Ọ nọ nwan mę enyi wụrụ anị-eze, mę enyi wụrụ ndị nchụ-ejan Osolobue ẹ hụn wụ Nedi ẹ. Ogho le okiki ya wụrụ nke ẹ jęnrin ejen! Isee.

⁷ Lee ẹ!

O gi orukpu lala;
ęnya ile jęnkọ d'a hụn a—
ke ndi hụ dụn a ihien.

Ndi anị ile ri uwa
jęnkọ d'a kwan ẹkwan
make ufiri ẹ.

Erira k'o jęnkọ d'a ri! Isee!

⁸ “Mme wu Ibuzo le Ikpazuun!”

Ya ke Di-nwonn-ęnyi wu Osolobue ku—onye hụ hụn ri kikenni, hụn ri mbu, hụn lalani; Onye hụn nwon iken ile.

Jonu A Hun Jizosi

⁹ Mme wu Jonu nwene unu, hun we ri e gi ifiri Kraisti e kpokpo ke we don ri e gi ifiri ẹ e kpokpo onu; m wuzikwo onye Ali-eze Kraisti ke unu don wu; m wetuzikwo obi ali e din ndidi rike unu.

We dupu m shi ali Patimosi, ali hu mirin nohunme, makeni m'e ku oku Osolobue le ni m'a shia ni Jizos' eri.

¹⁰ Ogen m gi ri ebahun, o ru uhuhin ohu, Uhuhin Di-nwonn-ęnyi, ebe m ri ime mmon, m no nu oken olu ri e ku oku azuun m. Olu hu no ke opi ri a hannu.

¹¹ O si, “Detu ihien i ri a hun ye ime ehuhuo, y'e zijen ni uka esani ya:

uka ri Efesosi,
uka ri Sumena,
uka ri Pegamom,
uka ri Tiatira,

uka rị Sadisi,
 uka rị Filadefia
 lezi uka rị Laodishia.”

12 Ya m nọ gbehuto, ni m hun onye nwe olu ahun rị a gwa m oku. E gbehuto m, m nọ hun obu-ukpe esa we gi goru memẹ,

13 hunzi onye nọ ke Nwa nke Ihian etintinnai obu-ukpe esani. O yi ewuru tueru ali, gi ihien goru kenhunme obi e.

14 Isi e le ntutu e hu a chan uchana leke oruru ochan, leke okpukpu mirin-oyi ochan wu s'no. Enya a ebuo hu e nwun ke okun rị e nwunni;

15 uku-ali a nọ ke igwe w'a kpo bronzu, hun we finchan ohunma-ohunma, e gbuke nọke si we gi okun dunchanpuchanrin unyin rị n'a. Olu e nozi ke uzun oken mirin rị e huni.

16 O gi kokise esa eka-nni. Opia-agma onunai tu nko gha a onu suefuha. Ihun e hu e ti oda-oda ke enyanwun don e ti efinnai.

17 Ogen m gi hun a, m nọ dan ani uku a nọke onye nwunni. Kani, o nọ bu eka-nni e kwasi m, si, “Atulegun. Mmẹ wu Ibufo le Ikpazuun.

18 Mmẹ wuzi onye hu rị ndun! M te nwunhun anwunhun, kani, lee e, m rị nwan ndun jennin ejen. Mmẹ gizikwo isanhan Onwun le Ali-mmọn.”

19 “Detu nwan ihien i rị a hun—ihien rị ogenni le ihien jenkọ d'e me ihun.”

20 “O me nke kokishia esa ahun i hun eka-nni m le obu-ukpe esa hu: kokishia esa hu wu mmọn-ozu esa ndi hu hun a nokin enya uka esa hu. Obu-ukpe esa hu wu uka esa hu.”

Isi Nke Ebuo

Ozi Jesu Si We Zi Ndi Uka Ri Efesosi

¹“Dejenni onye-ozì hụn a nọkin ọnya ụka rị Efesosi, sị a,

Lee ihien onye hụ gi kpakpando ọsa hụ ọka-nni ẹ, hụn e jehunmẹ ime obu-ukpe ọsa hụ we gi goru memẹ, a hunchanrìn ke we nọ, ku:

² A maringhọ m ihien ile onụ rị e mẹ: ke unu don rị a gbakemẹ le ke unu don rị e wetu obi alị e dingbu ihien ile. A maringhọ m nị onụ ara ye ndi e mẹ eje-ihien efe; nị onụ e leleguọ ndi hụ kpọ enwen we ndi-ozì pu-ichen, hụn a nị ele we ndi-ozì pu-ichen kaka.

³ A maringhọzi m nị unu gi ufiri ọfan m e wetu obi e dingbu ihien ile, a narin afunfun—bụ ndun e k'e gukwọ nwan unu.

⁴ Kani, onwan wu ihien rị e ze m ize ebe unu rị: unu a latoguọ ihien-osusuọ ahun unu nwe isi-ibuzọ.

⁵ Nyanhan nị nwan ebe unu te rị nị onụ d'a dan, unu e gbehuto, memezi ihien ndi hụ unu te rị e mẹ isi-ibuzọ. Unu emen'ẹ, a bja m d'e wepu obu-ukpe unu onodi a—mmani unu bihuto ọka.

⁶ Kani, o nweghọ ihien rị mma unu rị e mẹ: ihien ndi itu Nkolitja e mẹ, hụn e ze mme le enwen m ize, e zezikwọ onụ nwen ize.

⁷ Onye nwon ntin ya nụ ihien Mmon-nsọ rị a gwa ụka rị ichen-ichen! Onye hụn merini ke m k'e ye iken n'o gi ri mkpuru-osisi ahun e ye ndun, hụn rị Paradaisi, Alị Izu-iken Osolobue.”

Ozi Jizosi Si We Zi Ndi Uka Ri Sumena

8 “Nke onye-ozì hùn a nòkin ẹn̄ya ụka rị Sùmèna, dejenn'e, sị a,

Lee ihien onye hụ wụ Ibuzo lẹ Ikpazuun ku, onye ahun te nwunhunni kanị o huzi nwan ndun: o sị,

9 A maringho m afunfun onu rị a ta, marinzikwo ke onu mehan ogbenye (kanị odafin ke unu wu nke-esi). A maringho m mkpari unu rị a narin eka ndi hun a kpọ enwen we ndi Ju, bu ele we ndi Ju, kanị ndi ulo-ofufe Ekwensu ke we wu!

10 Atule ni egun afunfun unu jenkọ d'a ta. Lee e, Ekwensu e d'a tu ndi hu ime unu ye unonangan keni we gi e lele unu. Unu k'a ta afunfun akp'ohin iri. Kwodon ni okukwe unu d'e ru onwun. Unu kwodon e, e ye m unu ndun—gi e tu unu ugon nọke okpu-eze.

11 Onye nwon ntin ya nu ihien Mmon-nsọ rị a gwa ụka rị ichen-ichen! Onwun nke ebuo eruko onye hun merini ehụ, o ruko onye hụ ehụ.”

Ozi Jesu Sị We Zi Ndi Uka Rị Pẹgamom

12 “Nke onye-ozì hùn a nòkin ẹn̄ya ụka rị Pẹgamom, dejenn'e, sị a,

Lee ihien onye hụ gi opia-agma onunai hụ tu nko ku:

13 A maringho m ebe unu bi, ebẹhụ ukpo Ekwensu rị. Bu unu kwodonhukwo efan m. Unu a ghorini, sị ni onu ekwerini ni m, ke ogen we gi gbude osheri m we gi e don ẹn̄ya wu Antipasi, hun we gbu ime igunrun onu, ime obodo hụ Ekwensu bi.

14 Kanị, o nwegho ihien ndi rị e ze m ize ebe unu rị: o nwongho ndi rị ime unu ebẹhụ hun e sọn nkuzi Balam, hun kuzi Balakị ihien o gi bu uke cheni

umu Izreḷu, me we ri ihien-oriri we gi rua mmon, mezikwo we ghere.

15 O nwonghokwo ndi e son nkuzi ndi itu-Nikolitia.

16 Gbehuto ni nwan. Omeni unu egbehutoji, m k'a bia egwa d'e gi oṣia-agma ri m onu luson ndi hu agha.

17 Onye nwon ntin ya nu ihien Mmon-nso ri a gwa uka ri ichen-ichen! Onye hu merini ke m jenko d'e yebeye **mana** hu zuerini. M k'e yezikwo a omuma ochan hu we deye efan ohun, efan ohun hun o me ni o nwonni onye marin n'a, wezuka onye hu we ye ya wu omuma.”

Ozi Jizosi Si We Zi Ndi Uka Ri Tiatira

18 “Nke onye-ozu hun a nokin enya uka ri Tiatira, dejenn'e, si a,

Lee ihien Nwa Osolobue ku, onye ahun enya a e nwun ke okun; onye ahun ukw-alu a no ke igwe bronzu we finchanchanrin ri e gbukeni: o si,

19 A maringho m ihien ile unu ri e me—ke ihien-osusuo onu nwe ke okukwe onu ke ozi unu ri e jen ke ihien ile unu wetu obi alu e dingbuchanrin. A maringho m ni ihien unu ri e me kikenni ka ihien unu me isi ibuzo.

20 Kani, onwan wu ihien ri e ze m ize ebe unu ri: unu e ye okpoho hu wu Jezibelu efe, okpoho hu hun a kpọ enwen e onye-amuma, hun gi ihien o ri a kuzi e dufie ndi-idibo m, e me we a ghere, e ri ihien-oriri we gi rua mmon.

21 E yeole m'a efe n'o gbehuto, kani o juguo n'o gbehutoko gherebehi.

²² Lee ę nwan, m k'a tu a ye beđi emu; m k'e me ndi ya le we gba a ghere ta eje-afunfun—sukpan ni we gbehuto, mebehi eje-ihien ndi hu o ri e me.

²³ M k'e gbu umu a. Uka ile k'e gi ę marin ni mme wu onye hu e legha uche le obi onye owule; m k'a kuzikwo onye owule ime unu ugwo-orun furu ihien o ri e me.

²⁴ Kani, nke ndi hoduni ime unu ndi ri Tiatira, hun ghaleni e son nkuzini, hun keleni munrun ihien ndi hu w'a kpo 'Oken ihien-nzuzue Ekwensu,' m si onu ni ebuyeko m onu ibu ozo—

²⁵ ka kwonkenme ni ihien unu gi d'e ru ni a bia m.

²⁶ Onye hun merini, hun k'a gha e mesonme uche m d'e ru isi-njendeme, ke m k'e we ndi ali ichen-ichen che okpuru ę kima,

²⁷ o k'e gi okpo-igwe ki we,
o k'e tikpochanrin we

leke ite we gi urua kpu,

²⁸ noke ke Nedi m don ye m iken m gi a ki. M k'e yezikwo onye merini kokise utuntun hu.

²⁹ Onye nwon ntin ya nu ihien Mmon-nsori a gwa uka ri ichen-ichen!”

Isi Nke Eto

Ozi Jesu Si We Zi Ndi Uka Ri Sadisi

¹ “Nke onye-ozu hun a nokin enya uka ri Sadisi, dejenn'e, si a,

Lee ihien onye hu gi Mmon esa Osolobue le kokise esa hu ku: a maringho m ihien ile unu ri e me. W'e weri unu ke ndi ri ndun, kani unu a nwunhuguo!

² Tẹhin ni nwan, unu e donzi ihien hoduni, hun hodu ekere n'o nwunfu—makeni a hunguọ m'a ni orun onu ezuni oke enya Chuku m.

³ Nyanhan ni nwan ihien we kuzi unu le ihien onu nu, unu e gi e don, gbehuto. Omeni unu etenhinni, m k'a bia nọke ohin, unu amarinko ogen m'e gi banhan ebe unu ri, kaka!

⁴ Kanj, o nwegho ndi buleni oda ri Sadisi hun keleni ru ekwa we unyin. We jenko d'e yiri ekwa ochan, son m e jehunme, makeni we furu efuru.

⁵ Onye hun merini k'e son we yiri ekwa ochan. Efichanpuko m efan onye ahun ime ehuhuo nke ndun, kaka! M k'a no id'anya Nedi m le ndi mmnon-ozu e kpo efan onye hu, ku e ni a maringho m onye o wu.

⁶ Onye nwon ntin ya nu ihien Mmon-nsọ ri a gwa uka ri ichen-ichen!”

Ozi Jizosì Sị We Zi Ndi Uka Ri Filadefia

⁷ “Nke onye-ozu hun a nokin enya uka ri Filadefia, dejenn'e, si a,

Lee ihien onye hu ri nsọ ku, onye hu wu ihien o si ni ya k'o wu; onye hu gi isanhan Defidi; onye hu we ghaleni a saeka a gunma uzọ o gunpu mobu gunpu uzọ o gunma: o si,

⁸ A maringho m ihien ile unu ri e me. Lee e, a gunpuguo ni m onu uzọ, hun o me ni o nwonni onye k'a saeka gunman'a. A maringuo m ni onu enwekeni iken bu unu hukwo e me ihien m ku, unu aghorini ni unu a maringho efan m.

⁹ Lee e! M k'e wehe ndi unu-ofufe Ekwensu hu we si n'o wu Ulo-ofufe ndi Ju, ndi ahun a kpo enwen we ndi Ju bu ntụ ro, ele we ndi Ju, a bia we ukụ unu d'a

kponi unu isi ali, keni we hun uzo marin ni ihien unu suo m.

¹⁰ Makeni unu e wetuguo obi ali dingbuchanrin ihien ile ke m don gwa unu, aniko m afunfun hun lalani we jenkọ d'e gi lele ndi ile ri ime uwa ru unu ehụ.

¹¹ M lala egwa, kwonkenme ni ihien unu gi, amangbe w'a narin onu okpu eze we k'e gi tu unu ugon.

¹² Onye owule merini ke m k'e gi henrin iden* ime Ulo-nsọ Osolobue m, o ghakozi ebefu pu, kaka! M k'e de efan Osolobue m le efan Jerusalem ohun hu ye e ehụ. Jerusalem ohun hu wu obodo-uku Osolobue m. Ya wu Jerusalem k'a gha enu-igwee le eka Osolobue m hidan; m k'e dezikwo efan ohun m ye onye ahun ehụ

¹³ Onye nwon ntin ya nu ihien Mmon-nsọ ri a gwa uka ri ichen-ichen!”

Ozi Jesu Si We Zi Ndi Uka Ri Laodishia

¹⁴ “Nke onye-ozu hun a nokin enya uka ri Laodishia, dejenn'e, si a,

Lee ihien onye hu wu 'Isee' hun oku Osolobue gha a bun ku—onye ahun wu Osheri we gi e don enya; Osheri ahun wu onye ezioku; Onye hu ihien ile Osolobue ke gha eka bia: o si,

¹⁵ A maringho m ihien ile unu ri e me: unu anuni okun, onu ajuni oyi. K'o ri m, unu a nu okun mobu ju oyi!

¹⁶ Ebe o me nwan ni unu me nan: unu anuni okun, unu ajuni oyi, m'e d'a gha onu m jupu unu!

¹⁷ Unu ri a si, 'M wu odafin, a baole m uba, o nwonzini ihien a ko ni m.' Kani, unu a marin n'o

* **Isi Nke Eto:12 Pila**

nwonna ke o han unu kaka, ni onu e ruguo ihien a gba enya-mirin, ni ogbenye ke onu wu, ni onu wu enya-mpin, ni unu gba oto!

¹⁸ M ri nwan a dun unu odun: nonnarin ni m goru we gwaleni, hun we gi okun dunchanpu unyin ile rin'a, keni unu hun uzọ wuru idafin; unu e nonnarinzi m ekwa ochan yiri, gi e kpume oto unu hun e me ifenren, amangbe w'a hun a; nonnarinzi kwọ ni m ogun-nya tuye enya, keni unu leghama uzọ.

¹⁹ Ndi m nwe ihien-osusuọ we ke m'a jugbo, uwe ke m'e ye afunfun keni we nwonnin uche. Wepuhakwo ni nwan obi, unu e bihuto eka.

²⁰ Gon ni ntin! M turu nwan onumuzo, a du eka, onye nu olu m gunfu uzọ, a banhan m d'e kunrun e, e son m'e ri, o son m ri.

²¹ M k'e ye onye merini onodi n'o son m nodi elu ukpo-eze m, nọke ke mme nwen don meri, son Nedi m nodi elu ukpo-eze e.

²² Onye nwon ntin ya nu ihien Mmon-nsọ ri a gwa uka ri ichen-ichen!”

Isi Nke Eno

Kę W'e Fee Osolobu Imę Elu-igwee

¹ Onwan e meguu, m no lee enya, hun onumuzo we gunpu elu-igwee. Olu hu gwa m oku mbu hun no ke oken opi no si m, “Bia enu ebeni, ni m ghoṣi i ihien jenkọ d'e meni ihien ndini meguu.”

² Ozigbo, m no ri ime-mmọn. M no hun ukpo-eze ime enu-igwee ebegu, hunzi onye ohu nodi ali elu e!

³ Onye hụn nọdị alị ebèhụ hụ e gbuke kẹ ọmụma w'a chọ achọ w'a kpọ jaspā lẹ hụn w'a kpọ kaneliani. Ekọn-lẹ-ogugu hụn e nwun kẹ ọmụma w'a chọ achọ wụ ẹmaradi fihunmẹ ukpo-eze hụ ohi-ohi.

⁴ Ukpo ẹnọ-kwasị-ogun fihunmẹ ukpo-eze hụ ohi-ohi. Ndi-isi ẹnọ-kwasị-ogun nọdisonmẹ ukpo ndi hụ. Wẹ ile yisonmẹ ẹwuru ọchan, kpusonmẹ okpu-eze goru.

⁵ Amuma hụ a gha ukpo-eze hụ e bepūha; ụzun mirin rị e denni lẹ akpabọ hụzị a gha ukpo-eze hụ a hanpūha. Ukpe ẹsa rị ihun ukpo hụ e nwun—ukpe ẹsanị wụ Mmon ẹsa Osolobue.

⁶ Ihiẹn rịkẹ ohimin wẹ gi ughegbe mēmẹ rị ihun ukpo hụ; o behụ nwanran-nwanran, e nwun zai.

Ihiẹn ẹnọ rị ndun ẹnya junsom mẹ ihun lẹ azuun nọhunmẹzikwọ ukpo-eze hụ:

⁷ nke ibuzọ rị kẹ ẹworo; nke ẹbuọ rị kẹ oken-efin; ihun nke ẹtọ rị kẹ ihun ihian; nke ẹnọ rị kẹ ugon rị e feni.

⁸ Ihiẹn ẹnọ ndini rị ndun nweşonmẹ nku isin-isin. Ẹnya jun wẹ ụzọ ile—kẹ ime wẹ kẹ azuun wẹ. W'a ra bubehi ẹbu—kẹ uhinhin kẹ efinnai—ihiẹn wẹ a busonmẹ wụ,

“Nsọ, nsọ, nsọ—kẹ

Osolobue hụn wụ Di-nwonnini-enyi rị!

Osolobue hụn nwon iken ile—

Onye hụn rị mbụ,

hụn rị kikenni,

hụn lalani.”

⁹ Ogen ọwule, ihiẹn ẹnọ hụ rị ndun gihu yeguun onye hụ rị ndun jenin ejen hụn nọdị anị ukpo hụ ọghọ lẹ mgbaye lẹ ekele ẹnina,

¹⁰ ndi-isi ẹnọ-kwasị-ọgụn ahun a dan alị ihun Onyẹ hụ nọdị alị elu ukpo-eze ahun, Onyẹ rị ndun jẹnrin ejen, fe ẹ, tūha okpu-eze wẹ ye alị ihun ukpo hụ, a sị,

¹¹ “Chuku-Nna ẹnyi!

Y'e furughọ onyẹ wẹ a ja mma—
y'e furughọ nị w'e ku ẹ ni
oghọ lẹ mgbaye lẹ ikẹn
wụ nke i.

Makẹni, iyụ ke ihien ile.

Makẹni y'a choghọ,
i nọ mẹ wẹ rị;
makẹni y'a choghọ,
ị nọ ke wẹ.”

Isi Nke Isen

Nwa-ebulu Osolobue Hụ Sụọ Ru Ogo Ihien Ile

¹ M nọ hụn ẹhụhụọ wẹ fifiima ẹka-nni onyẹ hụ nọdị anị enu ukpo-eze hụ. Wẹ dejun ẹhụhụọ hụ ihien, kẹ ime ẹ kẹ azụun a, gi eriri ẹsa kẹnme ẹ.

² M nọ hụnzị mmọn-ozị ohu kin-akwanran k'o gi okẹn olu e yi oro, a sị, “Onyẹ furu hụn k'a topu eriri ndị hụ, fifipụ ẹkukwo hụ?”

³ Kanị, o nwonni onyẹ ọwulẹ rị elu-igwee mọbu enu-ụwa mọbu okpuru-ụwa hụn saeka fifipụ ẹhụhụọ hụ mọbu lee ẹnya ime ẹ.

⁴ M nọ kwanma ẹkwa ọda-ọda, makẹni o nwonni onyẹ wẹ hụn furuni, hụn k'a fifipụ ẹhụhụọ hụ mọbu lee ẹnya ime ẹ.

⁵ Ya kẹ onyẹ ohu ime ndi-isi hụ nọ sị m, “Ak-wanzile! Lee ẹ, Ẹworo ebọn Juda, Mkpogun Defidi,

e meriguo—o k'a saeka tofu eriri esa ndi hu, fifipu ekukwo hu.”

⁶ Ya m no hun Nwa-ebulu hun noka si we te gbu e egbu k'o turu egbata ukpo-eze hu le ihien eno hu ri ndun le ndi-isi eno-kwasi-ogun hu hun we ile fihunme ya wu ukpo-eze. Nwa-ebuluni nwon mpin esa le enya esa—hun wu Mmon esa Osolobue, hun Osolobue zijen elu-owa ile.

⁷ Nwa-ebulu hu no jen d'e weri ehuhuo hu we fifima, hun ri aka-nni onye hun nodi enu ukpo-eze hu.

⁸ Ogen o gi weriguu ehuhuo hu, ihien eno hu ri ndun le ndi-isi eno-kwasi-ogun hu no dan ali ihun Nwa-ebulu hu; onye owule ime we gi ubo le afere nsensi we gi goru mememe hun nsensi jun ime e. Nsensini wu ekpere ndi nke Osolobue.

⁹ Ya we no bu ebụ ohun, si,

“Iyụ furu

hun k'e weri ehuhuo hu,
hun k'a topu eriri ndi hu
we gi kenme e;

makeni we gbu i,

i no gi edeke i

gbapuhani Osolobue ihian
ime ebun owule,
ime asusu owule,
ime ali owule
le ime ndi owule.

¹⁰ Y'e meguo we wuru

ali-eze le ndi nchu-egan
ebe Osolobue enyi ri;

we k'a ki elu-owa.”

11 E lezi m ęnya, m nọ nụ olu ndị mmon-ozu bu ọda hụn fihunme ukpo hụ ohi-ohi le ihien ndi hụ ri ndun le ndi-isi hụ. Ndi mmon-ozini e bukenmeke ọda, we ri nnu-uku ole-le-ole le ijeri ole-le-ole.

12 We hụ e gi oken olu a bu ebụ, a si,
 “Nwa-ebulu hụ we gbu
 e furughọ hụn w'e tuchan,
 ni iken le aku-le-uba
 le amamihien le akwanran
 le mgbaye le ogho le ojja-mma
 wu nke e!”

13 M nọ nuzi ke ihien ile we ke eke ri a bu ebụ—
 ke hụn ri enu-igwee ke hụn ri elu-ụwa ke hụn ri
 okpuru ụwa ke hụn ri ime ohimin. Ihien we ri a bu
 wu:

“Ojja-mma le mgbaye
 le ogho le okiki
 ya wusonme nke onye hụ
 hụn nodi ani elu ukpo-eze—
 le Nwa-ebulu hụ—
 jerin ejen!”

14 Ihien eno hụ ri ndun nọ si, “Isee!” Ndi-isi hụ nọ
 dan ali, fe Nwa-ebulu hụ.

Isi Nke Isin

Nwa-ebulu Hụ A Topu Eri Ndị Hụ

Eri Nke Ibuzo

1 Ya m nọ hụn ke Nwa-ebulu hụ topu eriri ohu
 ime eriri esa ahun we gi kenme ehuhuo hụ, m nọ
 nụ ke ohu ime ihien eno hụ ri ndun gi oken olu
 hankenme ke akpabo, si, “Bia!”

² M nọ lee ọnya, e lee ọshin ọchan! Onye rị e nyinn'ẹ gi ọtaa. Wẹ nọ ye ẹ okpu-eze, ọ nọ nyinrin ọshin ẹ pụ d'e merisonme agha.

Eriri Nke Ebuo

³ Ogen Nwa-ebulu gi tofụ eriri hụn me we ẹbuo, m nọ nụ ke hụn me ẹbuo ime ihien ẹnọ hụ rị ndun si, “Bia!”

⁴ Ya ọshin ọzọ nọ fuha. Onwan e nwun ufie-ufie. Wẹ nọ ye onye rị e nyinn'ẹ iken n'o wepu udon elu-uwu, keni ihian gbume ibe we. Wẹ nozi we ọpia-agma hi-ogbe ye ẹ.

Eriri Nke Eto

⁵ Ogen Nwa-ebulu hụ gi topu eriri hụn me we eto, m nọ nụ ke nke eto ime ihien ndi hụ rị ndun si, “Bia!” M nọ lee ọnya, e lee ọshin ogi! Onye rị e nyinn'ẹ gi ihien we gi a ma ihien.

⁶ M nọ nụ ihien nọke olu rị e ku oku k'ọ gha etintinnai ihien ẹnọ hụ rị ndun hanpuha, a si, “Ọka jenko d'a kogbu enwen ẹ: mkpu ọka-witi ẹnọ k'a wude egbo-oron akpu-uhuohin! Mkpu ọka-bali mmakalaka mmebuo k'a wude egbo-oron akp'ohin! Ka e wiwikwole ofungbon-olivu le manya!”

Eriri Nke Enọ

⁷ Ogen Nwa-ebulu hụ gi topu eriri nke ẹnọ, m nọ nụ olu hụn me we ẹnọ ime ihien ndi hụ rị ndun, k'ọ si, “Bia!”

⁸ E lee m ọnya, e lee ọshin e nwun ehuhuo-ndun, ehuhuo-ndun, kani ọ hụ e nwun nanhin! Efan onye rị e nyin n'ẹ wu Onwun; Ali-mmọn sonko a. Wẹ nọ kebe uwa uzọ ẹnọ, ye we iken igi ọpia-agma le unwun

lẹ emu lẹ eje-anu ndi ri elu uwa gbupu uto ohu rin'a.

Eri Nke Isen

⁹ Ogen Nwa-ebulu hu gi tofu eriri nke isen, m no lee enya okpuru ukpo nchu-egan, m no hun ume-ndun ndi hun we gbu make oku Osolobue le eri we shiani Jizosi.

¹⁰ We no weshi olu we enu, e yi, “Euu Di-nwonnienyi, Onye hun ihien ile ri aka a, onye ri nsọ, onye ezioku! Nani ke y'e biehan d'e kin ndi ri enu-uwa ikpe, gbugwari we ke we don gbu enyi?”

¹¹ Ya we no ye onye-onye ime we ewuru ochan tueni, si we zuzi iken ekere ni umune we le ndi-idibo ibe we zugu onu, ndi ahun ihian k'e gbu ke we don gbu we.

Eri nke Isin

¹² Ogen Nwa-ebulu hu gi tofu eriri nke isin, ali no mahie oda-oda, anwun no gime ngi ke ekwa-ogi, ifon hun shiaguni no nwunhuto, nwunme edeke-edeke.

¹³ Kokishia no gha elu-igwere danyesonme ani—noke ebe oken ufere no nutusonme ogbe figi chanleni.

¹⁴ Igwere no fori noke ebe we no fifima ehuhuo, wepu. We no wepu ugu ile le ali ile mirin nohunme onodi we.

¹⁵ Ya ndi-nze uwa le ndi uku le ndi-ndu-agma uku, le ndi idafin, le ndi ile we gi oku we e don le ndi ozo ile—ke igbon ke ndi nwe enwen we—no shisonme ime okporo le ebe omuma risonme elu ugu d'a wari,

¹⁶ a si ugu le omuma ndi hu, “Dodo ni, dankwasị ni enyi! Ni unu zueme enyi make Onye hun nodi elu

ukpo-eze hụ gha e legha ẹnị; make ọnụma Nwa-
ebulu hụ ghazikwo e kunrun ẹnị—

¹⁷ makeṅi oken uhuhon we gi a kpo ọnụma a
biaguo! Onye wu nwan onye ahun jenkọ d'a sa eka
wuzo!”

Isi Nke Eṣa

Madu Nnu Ogun-mmesato Hu

¹ Onwan e meguu, m no hun mmon-ozì eno ke we
turusonme ebamin eno uwa. We turusonme ebenu
e gbondon ufere eno hun e fe ime uwa, amangbe
ufere e fezi uwa mobu ohimin mobu osisi owule.

² Ya m no hun mmon-ozì ozo k'o gha azuun
owuwa-nya-anwun puha, shiko elu; o gi ihien Os-
olobue ri ndun gi e ye ahima. O no gi oken olu gwa
mmon-ozì eno hu we ye iken ni we gi wiwi uwa le
ohimin oku,

³ si we, “Ekewiwile ni uwa mobu ohimin mobu
osisi owule; cheri ni ni enyi yeguu ndi idibo Os-
olobue enyi ahima ezimezi-ihun we.”

⁴ M no nwan nu madu ole we ye ahima ahun.
Madu nnu ogun-mmesato ke we ye ahima hu ime
ikpun-ulo ile ri Izrelu:

⁵ nnu iri-kwasì-ogun wu ndi ikpun-ulo Juda;
nnu iri-kwasì-ogun wu ndi ikpun-ulo Rubeni;
nnu iri-kwasì-ogun wu ndi ikpun-ulo Gadi;

⁶ nnu iri-kwasì-ogun wu ndi ikpun-ulo Asha;
nnu iri-kwasì-ogun wu ndi ikpun-ulo Naf'tali;
nnu iri-kwasì-ogun wu ndi ikpun-ulo Manase;

⁷ nnu iri-kwasì-ogun wu ndi ikpun-ulo Simionu;
nnu iri-kwasì-ogun wu ndi ikpun-ulo Livai;
nnu iri-kwasì-ogun wu ndi ikpun-ulo Isaka;

⁸ nnu iri-kwasị-ogun wu ndi ikpun-ulo Zebulun; nnu iri-kwasị-ogun wu ndi ikpun-ulo Josefu; nnu iri-kwasị-ogun wu ndi ikpun-ulo Benjamini.

Igunrun Ihian Gha Ali Ile Ri Ichẹn-ichẹn Puhā

⁹ Onwan e meguu, m no lee enya, hun igunrun hi-ogbe, hun o me ni o nwonni onye saeka gun we. We gha ali ile, ebon ile, ndi ile, le asusu ile puha. Igunrunni turu ihun ukpo-eze hu le ihun Nwa-ebulu hu. We yisonme ewuru ochan tueru ani. Onye-onye ime we gisonme iguru eka.

¹⁰ We hu e gi oken olu e yi oro, a si,
“Nzuofuha gha eka Chuku enyi
hun nodi enu ukpo-eze
le Nwa-ebulu hu a bia”

¹¹ Ndi mmon-ozu ile turusonme ebegu, fihunme ukpo hu le ndi-isi hu le ihien eno hu ri ndun; we no dan ali ihun ukpo hu, ke isi ali, fe Osolobue,

¹² a bu ebuni:
“Isee!

Ija-mma le ogho
le amamihiẹn le ekele
le mgbaye le iken le akwanran
wu nke Chuku enyi
jenrin ejen! Isee!”

¹³ Ya onye ohu ime ndi-isi hu no si m, “Elee ndi wu ndini yi ekwa ochan tueru ali? Elebe ke we gha bia?”

¹⁴ M no si a, “Di-okpa, iyu marin ndi we wu.” Ya o no si m, “Nndini wu ndi hun gha oken ukpokpo hu puha. E giguu we edeke Nwa-ebulu hu su ewuru we, ewuru we e henrisonme nke ochan.

¹⁵ Ya hain we gi nwan ri ihun ukpo Osolobue e fe e uhinhin le efinnai ime Ulo-nso a. Osolobue, Onye

hụn nọdị anị elu ukpo-eze, k'a nọyeni wẹ, chedon wẹ.

¹⁶ Ẹgụn ihien-oriri lẹ ihien-orira agunkozi wẹ. Anwun mobu ihien owule a hụn okun amakozi wẹ.

¹⁷ Makeni Nwa-ebulu hu hụn ri etintinnai* ebehụ ukpo hu ri k'a wuru onye-ndu wẹ; o k'e du wẹ nọkẹ onye e du anu, shi isi-mirin ndi hu mirin e ye ndun gha a bia. Chuku jenkọ d'e finchanpu enya mirin owule ri wẹ enya."

Isi Nke Ẹsatọ

Eriri Nke Ẹsa Hu Lẹ Opi Ẹsa

¹ Ogen Nwa-ebulu hu gi topu eriri nke ẹsa, elu-igwee ile nọ mẹ juu ihien nọkẹ nkirishi mgbahunmẹ okuloku ohu.

² Ya m nọ hụn ndi mmon-ozu ẹsa hu hụn e turu ihun Osolobue. Wẹ nọ ye wẹ opi ẹsa.

³ Mmon-ozu ozọ, hụn gi mkpu goru w'a kpọ Sensa wẹ gi a dunni Osolobue nsensi okun, nọ bia d'e turu ihun ukpo nchu-ejan hu. Wẹ nọ kponye ẹ nsensi oda-oda, n'o gi ya lẹ ekpere ndi-nsọ ile e mẹ chu ejan elu ukpo nchu-ejan hu wẹ gi goru memẹ hụn ri ihun ukpo-eze hu.

⁴ Enwunrun nsensi hu ri a dunni lẹ ekpere ndi-nsọ hu nọ gha ẹka mmon-ozu hu a loshi elu ihun Osolobue.

⁵ Ya mmon-ozu hu nọ weri Sensa hu wẹ gi a dun nsensi okun, gi okun ri ukpo nchu-ejan hu hujun ẹ, tu a ye enu-uwu. Ya kẹ akpabo nọ han, mirin e den, amuma e be, ali a mahihie.

Opi Enọ Ibuzọ

* **Isi Nke Ẹsa:17** Lee 5.6

⁶ Ebehụ kẹ ndị mmọn-ozị ẹsa hụ gi opi ẹsa nọ kwademẹ nị wẹ gbu opi wẹ.

Opi Ibuzọ

⁷ Mmọn-ozị nke ibuzọ nọ gbu opi ẹ, ẹkwan-igwee lẹ ọkụn wẹ gwogbama ya lẹ ẹdeke nọ pụha. Wẹ nọ ma wẹ ye ime ụwa, ọ nọ dụnpu ụzọ ohu ọkụn, nato ụzọ ẹbuo; ime osisi ile, ọ dụnpuzi ụzọ ohu, ọ hodụ ụzọ ẹbuo; ọ dụnpuchanrinzi ẹfifia-ndun ile.

Opi Nke Ebuo

⁸ Mmọn-ozị nke ẹbuo nọ gbu opi ẹ, wẹ nọ tụ ihien nọkẹ ẹregede ugu ri a nwun ọkụn ye ime ohimin—azuun ohu nọ henrin ẹdeke, ọ hodụ azuun ẹbuo.

⁹ Ụzọ ohu ime ihien ndị ri ndun ri ime ohimin nọ nwunhun, ọ hodụ ụzọ ẹbuo. Ime ugbo-mirin ile, ụzọ ohu nọ tikpofu, ọ hodụ ụzọ ẹbuo.

Opi Nke Etọ

¹⁰ Mmọn-ozị nke etọ nọ gbu opi ẹ: kokise ohu hi-ogbe ri e nwun ọkụn lẹkẹ ọwa nọ gha igwere dan. Ime iyi ile ri ụwa, ọ danye ụzọ ohu nato ụzọ ẹbuo—uwe lẹ isi-mirin ri ichen-ichen k'ọ danye.

¹¹ Efan kokise hụ wu “Elumilu.” Ime mirin ile rinị, ụzọ ohu nọ lume ilu, ọ hodụ ụzọ ẹbuo. Ndị bu ọda nọ nwunhun, makeni mirin hụ ri e lu ilu.

Opi Nke Enọ

¹² Mmọn-ozị nke enọ e gbu opi ẹ, ihien nọ fian ẹnya-anwun azuun ohu, fianzikwo ifon lẹ kokise azuun ohu-ohu, latosonme wẹ azuun ẹbuo-ẹbuo. Ukpẹ wẹ nọ belua: wẹ kebe kẹ wẹ e nwunhan mbu ụzọ etọ, enwunkarizini wẹ ụzọ ẹbuo. Anwun amuchanrinzi kẹ uhuhin han k'o don a mu mbu; ifon etibiehanzi k'o don e ti mbu. Wẹ kebe

ụhụọhìn ụzọ ẹtọ, anwun amụkarizini ụzọ ẹbuo—
erirazikwo ke ifon me uhinhin.

¹³ M nọ lee ẹnya enu, hụn ugon ohu k'o feko ime
elu, yiko, “Nsongbu! Nsongbu! Oken nsongbu jenkọ
d'a rini ndi ile bi elu-ụwa ogen ndi mmon-ozì ẹtọ hụ
k'e gi nwan gbusonme opi ẹtọ hụn hoduni!”

Isi Nke Itenei

Opi Ẹtọ Hoduni Le Eje-mgbugbu Ahun

¹ **Mmon-ozì nke isen** e gbu opi ẹ, m nọ hụn kokise
ohu hụn gha elu-igwee danye ụwa. We nọ ye ẹ
isanhan oken-mgbugbu hụ migbu enwen ẹ.

² O nọ gunpu eje-mgbugbu hụ migbu enwen ẹ,
enwunrun nọ gha ebeku lopuhama ke enwunrun
oken okun we gi a dunchanpu unyin ri goru. Enya-
anwun le ufere nọ gba ishi make ufiri enwunrun
okun hụ gha ebeku a lofua.

³ Ya igurube nọ gha ime enwunrun hụ puhama,
berisonme enu-ụwa. We nọ ye we iken, udi iken hụ
akpi ri elu-ụwa nwe.

⁴ We nọ si we egbule efifia ri enu-ụwa mobu ihien
owule e nwun ehuhuo-ndun ehuhuo-ndun ri e sue
ime ugbo mobu ime ofia mobu osisi owule, ka we
ru ndi hụ nwonleni ahima Osolobue ezimezi-ihun
we ehụ, uwe suo.

⁵ We nọ ye igurube ndi hụ efe ni we ye ndi hụ
ezigbo afunfun, orogbo ifon isen—kani anini we we
gbu ndi hụ. Ufu we nọke ebe akpi nọ gba ihian.

⁶ Ogen ihienni e gi me, ihian k'a cho onwun,
ahunko we onwun; we jenkọ d'a chokenme ni we
nwun, kani, onwun k'a gba ni we oso.

⁷ Igurube ndị hụ rị ke eshin we kwademeguu we k'e gi jen agha. Ihien no ke okpu-eze goru risonme we isi. Ihun we no ke nke ihian.

⁸ Eñenren we sue ke ntutu ikpoho. Eze rị we onu no ke nke eworo.

⁹ Okpukpu rị we ehụ rị ke igwe onye-agma gi e gbondon obi; nku we hụ a zun uzun ke ebe eshin dokpunko ugbo-agma bu oda gbabanko ogo agha.

¹⁰ We nwesonme odundun. Edide w'a gba ihian risonme we odundun—o no ke edide akpi. Odundun we ke iken we gi e ye ihian afunfun orogbo ifon isen rị.

¹¹ Eze a ki igurube ndini we wu mmon-ozini oken-mgbugbu hụ migbu enwen e. Ndi Hibru a kpo mmon-ozini Abadonu; ndi Griki a kpo a Apolionu: *efan ebuoni wu “Onye-ntikpo.”*

¹² Nsongbu nke ibuzo a ghafeguo, ebuo lalazi.

E Gbupu We Uzo Ohu Ime Ndi Ri Elu-awa Lato Uzo Ebuo

¹³ **Mmon-ozini nke isin** no gbu opi e, m no nu ke olu gha mpin eno ri ntin eno ukpo nchu-ejan goru hụ rị ihun Osolobue a hanpuha.

¹⁴ Olu hụ no si mmon-ozini nke isin hun gi opi, “Topu mmon-ozini eno hụ we kenmeto oken iyi Yufretisi!”

¹⁵ Ya we no nwan topu mmon-ozini eno hụ, hun we kwademeguu, kenme we to, e che ogeñni, uhuohinni, ifonni le ahuan; we no nwan topu we keni we gbupu uzo ohu ime ihian ile ri elu-awa, gbuhodu uzo ebuo.

16 Ndi-agma hun nyiko eshin no puha, we wu ijeri-ohun ogun-iri (ya wu nnu-iri, nnu-iri uzọ nnu isenkwasi-ogun-isin). A nughọ m ole we ri.

17 Lee ke m don hun eshin ndi hu ime ohun m: ndi ri e nyin ni we yisonme ihien igwe we gi e gbondon obi we. Ihien igwe ndini e nwun ufie-ufie leke okun, enwunrun-enwunrun leke Safe, lezi unwanran-unwanran leke nsin-enya-anwun wu sofo. Isi eshin ndi hu ri ke nke eworo. Okun le enwunrun le nsin-enya-anwun wu sofo ghazi we onu a puha.

18 We no gi eje-ihien eto ndi hu ri a gha eshin ndi hu onu a fuha—ya wu okun le enwunrun le nsin-enya-anwun wu sofo—gbufu uzọ ohu ime ihian ile ri elu-ua, gbuhodu uzọ ebuo,

19 makeni onu eshin ndi ahun le odundun we ke iken eshin ndi hu risonme. Odundun we nosonme ke agwo, nwonsonme isi ke agwo. Isi ndi hu risonme we odundun ke we gi a ru ihian ehụ.

20 Ndi hu hodu elu uwa—ndi hu eje-ihien ndini gbuleni—egbehutoṅi obi mebehi eje-ihien we ri e me; alatonṅi we ife eje-mmṅon le ifesonme mmṅon we gi eka mememe—ke nke goru ke nke ona wu siva ke nke igwe bronzu ke nke omuma ke hun we gi osisi pin—mmṅon ghaleni e ri-eka e legha uzọ mobu a nu ihien mobu e jen ijen!

21 Egbehutozikwoni we mebehi njo ndini we e me: igbu-ochu, irua-mmṅon, ibu-nshi le igi iken eje-mmṅon a run, ughere, izu-ohin.

Isi Nke Iri

Mmon ozi Hu Gi Ehuhuo We Fifipu

¹ Ya m nọ hụn mmọn-ozị ozo kin-akwanran k'ọ gha elu-igwee hidanla. Orukpu fuhunmẹ ẹ; ekonle-ogugu rị ibe isi ẹ, ya nwen rị a okpuru; ihun ẹ nọ ke ẹnya-anwun. Uku a rị ke polu ẹbuo wẹ gi okun memẹ*.

² O gi ẹhuhuo mẹ ẹkere wẹ fifipu ẹka a. O nọ bu uku ẹka-nni ẹ che elu ohimin, bu uku ẹka-ekpen ẹ to akpakali.

³ O nọ gi oken olu, hụn nọ ke nke eworo rị e denni, yi oro. Ogen o gi yi oro, akpabo ẹsa ahun nọ han.

⁴ Ogen akpabo ẹsa ahun gi hanguu, m te cho ni m demẹ, kani a nọ m olu gha elu-igwee si, “Zueme ihien akpabo ẹsa hu ku, edetule ẹ!”

⁵ Ya mmọn-ozị hu m hụn k'o turu elu ohimin le akpakali nọ weshi ẹka-nni ẹ enu zime enu-igwee,

⁶ kun ẹfan Onye hu rị ndun jennin ejen, hụn ke elu-igwee le ihien ile rin'a, uwa le ihien ile rin'a le ohimin le ihien ile rin'a, si, “Ebiekozi wẹ, kaka!”

⁷ Kama, hụn **mmọn-ozị nke ẹsa** gihu gbu opi ẹ, ihien ahun mini Osolobue kwademe e mezuchanrin k'o don gwa ndi idibo ẹ ndi-amuma.”

⁸ Ya olu hu gha elu-igwee gwa m oku nọ sizi m, “Jen d'e weri ẹhuhuo hu fifipuni hụn rị ẹka mmọn-ozị hu uku a ohu rị elu ohimin, uku a ohu hu akpakali.”

⁹ Ya m nọ jen d'e kunrun mmọn-ozị hu, si a ye m ẹhuhuo hu mẹ ẹkere. O nọ si m, “Weri ẹ ri. O k'a suo i usuo onu nọke mirin-enwun, kani, o k'e lu i ilu ẹfo.”

¹⁰ Ya m nọ narin mmọn-ozị hu ẹhuhuo hu mẹ ẹkere ri, o nọ suo m usuo onu nọke mirin-enwun, kani, ogen m gi riguu a, ẹfo nọ lumẹ m ilu.

* **Isi Nke Iri:1** pila ẹbuo wẹ gi okun memẹ

11 Ya wẹ nọzi sị m, “I k'e buzi amụma banyeni ndị bu ọda, anị bu ọda, ndị asụsụ ichen-ichen bu ọda lẹ ndi-nze bu ọda.”

Isi Nke Mmanai

Ndi Osheri Ebuo Hu

1 Ya wẹ nọ ye m mkpịnsin wẹ gi a ma ihien. Mkpịnsin hu nọ kẹ ọkpọ. Wẹ nọ sị m, “Bia d'a ma Unọ-nso Osolobue lẹ ukpo nchụ-ẹjan, y'a gunzịkwọ ndi hụn rị ebẹhụ e fe ofufe.

2 Ka amale ihun-ezi Ulo-nso, hapu ohun—makeni e weguo w'a ye ndi ali ndi ozo rị ichen-ichen. Wẹ k'a zo obodo nso hu uku ọrogbo ifon ebuo kwasị ọgunnai.”

3 “M k'e ye ndi-osheri m ebuo iken bu-amuma, ku oku-Chuku, ọrogbo akpu-uhuhin ọgun eto kwasị nnu eto (ọgun mmeto kwasị nnu-uku), wẹ k'e yisonme ekwa ahio.”

4 Ndi osherini wu osisi olivu ebuo lẹ obu-ukpe ebuo hu rị ihun Onye-nwon-ụwa-ile.

5 Omeni ihian cho n'o me wẹ ihien ọwule, okun a gha wẹ onu puha, dungbu ndi inenren wẹ ahun cho ni wẹ me wẹ ihien; erira kẹ onye ọwule cho n'o me wẹ ihien ọwule k'a don nwun.

6 Wẹ nwon iken wẹ gi a kpokin enu-igwere amangbe mirin e zue ogen hu ile wẹ gi e bu amuma, e ku oku Chuku. Wẹ nwonzikwo iken wẹ gi e me mirin e henrin edeke—kẹ mirin rị iyi kẹ hūn rị ohimin, wẹ nwonzikwo iken wẹ e gi me ụdi ejensongbu lẹ afunfun ọwule biani ụwa ogen ọwule wẹ cho.

⁷ Wẹ shiaguụ ẹri wẹ, eje-anụ hụ hụn k'a gha eje-mgbugbu hụ migbu enwẹn ẹ pụha k'a lụsọn wẹ agha, mẹri wẹ, gbu wẹ.

⁸ Ozun wẹ k'a rị ụzọ ụwaya kanị rị obodo uku hụ wẹ gi ẹnya ime mmọn a kpọ Sodomu lẹ Ijiptu, obodo ohu hụ wẹ nọ kpogbu Di-nwọnni-wẹ.

⁹ Orogbọ akp'ohin ẹtọ lẹ mkpikpi, ndi rị ichen-ichen lẹ ndi ebọn lẹ asusu lẹ alị risọnme elu ụwa k'a gba ozun wẹ ilee; anikọ wẹ onye ọwụlẹ li wẹ.

¹⁰ Ndi bi ụwa k'a rị a ghoghọ ni madu ẹbuo hụ a nwunhụn, e mē mmemme, e yetari ibe wẹ ihien—makeni ndi-amuma ẹbuoni te bu afunfun toni ndi ile rị elu-ụwa.

¹¹ Kanị, oge nọ gi mēfu akp'ohin ẹtọ lẹ mkpikpi, ufere hụn e ye ndun nọ gha ebe Osolobue rị bia, banye ime wẹ, wẹ nọ turu ọtọ—okẹn egun nọ bia ndi hūnni wẹ.

¹² Ya wẹ nọ nū okẹn olu gha elu-igwee si wẹ, “Bia ni elu ebeni!” Ya wẹ nọ gi orukpu shi enu-igwee, id'anya ndi-inenren wẹ rị e lee wẹ ile.

¹³ Ozigbo, alị nọ mahihie ọda-ọda, azuun ohu ime obodo hụ nọ tikpo, ọ hodụ azuun itenei. Alị hụ mahihieni gbu madu ogun-iri kwasị nnu-mmesa (madu nnu-uku esa). Egun nọ tūkenme ndi hoduni, wẹ nọ kweri ni Osolobue hūn rị elu-igwee e hike ogbe.

¹⁴ Nsongbu nke ẹbuo a ghafeguo, lee ẹ, nke ẹtọ lala ẹgwa.

Opi Nke Esa

¹⁵ Ya mmọn-ozu nke esa nọ gbu opi ẹ, m nọ nū okẹn olu risọnme elu-igwee, a si,
“Alị-eze ụwa a wụrụlẹ nke Di-nwọnni-enyi

lẹ nke Kraịstị a hụn o tume;
o k'a ki jẹnrin ejen!”

¹⁶ Ya kẹ ndị-isi ẹnọ kwasi ọgụn hụ hụn nọdịsonmẹ
ukpo wẹ ihun Osolobue nọ dan anị, keni Osolobue
isi-alị, fe ẹ,

¹⁷ a bụ ẹbunị:
“Enyi rị e ye i ekele,
Chuku Nna,
hụn nwọn ikẹn o gi e mẹ ihien ile,
onye hụn rị kikenni, hụn rịzikwọ mbu.
Makeni y'e giguọ ikẹn i hi-ogbe kịma.

¹⁸ Ndị alị ile e te bughọ olulu;

kani iwe-lẹ-ọnuma ị
a biaọlẹ nwan.

Ogẹn y'e gi kin ndị nwunni ikpe
e ruguọ.

Ogẹn hụn y'e gi kụ ndị-idibo i ụgwọ,
e ruguọ nwan—
ndị idibo i ndị-amuma—

uwe lẹ ndị-nsọ
lẹ ndị a tū egun i—
kẹ ndị uku kẹ ndị nta.

Ogẹn y'e gi tikpọ ndị hụn e tikpọ ụwa
e ruguọzi!”

¹⁹ Ya wẹ nọ gụnpụ Ụlọ-nsọ ime enu-igwee,
wẹ nọ hụn Ẹkpẹti-nkwerigbama Osolobue ime
ebẹhụ. Amuma elu-igwee nọ besonmẹ, mirin nọ
densonmẹ, akpabọ nọ hansonmẹ; alị nọ mahihie,
ẹkwan igwere nọ dan ọda-ọda.

Isi Nke Mmẹbụọ

Okpoho Hụ Lẹ Dragonu

¹ Ya kẹ oken ahunlele pu-ichen no puha elu-igwee: okpoho yi enya-anwun ke ewuru no fuha; ifon ri a okpuru uku, okpu-eze kokise mmēbuo ri ri a isi.

² O ri ime. O hu a kwan ekwan make ni ime ri e me e. O hu a turu a oda-oda make ni omumu e ruguo a.

³ Ahunlele ozọ no mezi ime enu-igwee: eje-anu hi-ogbe w'a kpọ dragon' a puha; Dragonu ni e hike ogbe; o nwun ufie-ufie. Isi esa le mpin iri k'o nwe. Okpu-eze ohu-ohu, risonme e isi esa ndi hu.

⁴ Odundun a no zari uzọ ohu ime kokise ri elu-igwere, tu we ye ani—o hodu uzọ ebuo. Dragonu hu no turu ihun okpoho hu ri a cho n'o mu nwa, keni o ripu nwa a hun o gihu mupuha a.

⁵ Okpoho hu no mu nwa, nwata-okennyē, hun jenkọ d'e gi okpo-igwe ki ndi ani ile. Kani, hun o gihu mupuha nwata-okennyē hu, we no juru ya wu nwata, we e shi ebe Osolobue le ukpo-eze Osolobue ri.

⁶ Ya okpoho hu no gbashi ime atu d'a nodi ebegu Osolobue kwademe n'e, ebe we k'a no lepu a enya akp'ohin ogun-etọ kwasị nnu-etọ.

⁷ Ya we no luma agha elu-igwee, mmọn-ozu wu Maikelu le ndi mmọn-ozu e son n'e no lusun Dragonu hu agha. Dragonu le ndi mmọn-ozu e no lusunwari we.

⁸ Kani we no meri Dragonu hu. Anizi ni we ya le ndi mmọn-ozu e nodi enu-igwee.

⁹ We no tutu Dragonu uku hu, agwo mbu-mbu hu w'a kpọ Ekwensu, a kpọzi a Setani. Iya wu onye hun e dufie uwa ile. We no tutu e ye elu-uwa—iya le ndi mmọn-ozu e.

¹⁰ M no nwan nu olu ohu hannu ime elu-igwee, hun ri a si,

“Nzuofuha lẹ iken lẹ alị-eze Chuku ẹnị
lẹ okiki Kraịstị, onyẹ hụ o tume,
a biaguọ nwan.

Makeni a tutuguọ wẹ onyẹ ahun,
hun e kpesonmẹ umunẹ ẹnị,
ndị Itu-Kraịstị ibe ẹnị
ẹka Osolobue ẹnị uhinhin lẹ efinnai.

¹¹ Kani wẹ nọ gi ẹdeke Nwa-ebulu hụ lẹ oku wẹ gi
shian'a ẹri meri ẹ; egheni wẹ isi tuhu okukwe wẹ.

¹² Ya wu, enu-igwee ya ghoghoma nwan;
iya lẹ ndi bi ime ẹ!

Kani, nsongbu jenkọ d'a rinị uwa lẹ ohimin,
makeni Ekwensu e hidanguọ d'e kunrun onu.

O gi oken olulu bia—

makeni o maringuọ ni ogen ẹ hodụ ẹkere!”

Ekwensu E Buhezi Nsongbu E Elu-uwa

¹³ Ogen Dragonu hụ gi hun ni a tutuguọ w'a ye
elu-uwa, ọ nọ chuma okpoho hụ mu nwata-okennyẹ
hụ.

¹⁴ Kani, wẹ nọ ye okpoho hụ nku ẹbuọ, nku ugon
uku—n'o gi gha ebe agwo hụ ri fepu, shi ime atụ,
ebe wẹ jenkọ d'a nọ lepụ a ẹnya [ihiẹn nọkẹ] ahua
etọ lẹ ifon isin.

¹⁵ Ya agwo hụ, dragonu hụ, nọ gha onu a hupuha
mirin nọ ke iyi, n'o hukpu okpoho ahun, keni o
huru ẹ,

¹⁶ kani alị nọ yeni okpoho hụ ẹka: alị nọ shiapu
onu, luefu mirin hụ Dragonu hụ gha onu hupuha.

¹⁷ Ya ize okpoho hụ nọ ban Dragonu hụ, ọ nọ
pu, jenne d'a lusun umu okpoho hụ agha, ya wu
umu a ndi hoduni; ndi hun e mesonme ihien ndi hu

Osolobue ku; ndi hun a shia ni Jesu eri; ndi hun e kwonkenme oku Jesu.

¹⁸ Dragonu hu no turu enu ejan ri mkpenren ohimin.

Isi Nke Mmèto

Eje-anu Ebuo Hu

¹ M no hun eje-anu ohu k'o gha ime ohimin pula. Mpın iri le isi esa k'o nwe. Okpu-eze ohu-ohu risonme elu mpın ndi hu. Efan ri ichen-ichen e kuto Osolobue risonme elu isi esa hu.

² Eje-anuni m hun no ke Ubidon. Uku ali a no ke nke eje-anu w'a kpo Bi. Onu a no ke nke Eworo.

Ya Dragon' no we iken e le ukpo-eze e ye eje-anu hu, tume e oken onye-okiki.

³ Isi eje-anu ahun ohu no ke isi anu we gbugu, kan ebuhu we gi gbu e a lagu. Ihiere ri eje-anuni ehụ a tikenmeka uwa ile enya—nke wu ni we ile hu e son e.

⁴ We ile no feme Dragonu hu makeni iya ye eje-anu hu iken ahun o gi ki okiki. We nozi fe eje-anu hu, a si, “Onye no ke eje-anu hu? Onye k'a saeka lusan e ogun?”

⁵ We ye eje-anu hu onu o gi a nyan isi, e kusonme aru. We no ye e oghere kpa iken orogbo ifon ebuo kwasị ogunnaị.

⁶ O no shiapu onu kutosonme Osolobue, e kuto efan a, e kuto ebe o bi—ya wu, e kuto ndi ile bi elu-igwee.

⁷ We nozi ni a lusan ndi-nsọ agha, meri we; e wezikwo we ebón ile le ndi ile le asusu ile le ani ile che okpuru e kima.

8 Ndi ile bi enu-uwa k'e fe e—ya wu onye owule we deleni efan a ime ekukwo nke ndun Nwa-ebulu hu we gbu ni we d'e gbe iyeto uwa.

9 Onye nwon ntin, ya n'o nu.

10 Onye owule Osolobue si ni we k'a nwunrun a, we k'a nwunrun a; onye owule Osolobue si ni we k'e gi o^oia-agha gbu e, we k'e gi o^oia-agha gbu e.

Onwan cho ndidi le okukwe eka ndi nke Osolobue.

11 Ya m no hun eje-anu ozo hun gha ime-uwa pula. Mpin ebuo k'o nwe rike nwa-ebulu bu o ku ke Dragonu.

12 Okiki Eje-anu hunni ri a ki wu nke eje-anu nke ibuzo, hun o ye e kidonn'e. O wa a ye uwa le ndi hun bi ime e olu ni we e fe eje-anu nke ibuzo hu—hun ebe we gi gbu e lagu.

13 O gisonme oken orun-atumanya a kpa iken; o meghode okun gha elu-igwee hidan id'anya ihian ile.

14 O no gi orun-atumanya ndini we ye e efe rundonni eje-anu nke ibuzo hu dufie ndi bi elu-uwa; o si we kpu ya wu eje-anu nke ibuzo—hun ahun we be o^oia-agha isi ohu gbu e—kani o huzi nwan ndun.

15 We no nizi eje-anu hun-eboni saeka me ihien o me hun ihien ahun we kpu gi ri ndun, kunme umenren—ihien hu we gi udi eje-anu nke ibuzo hu kpu, nke wu ni ya wu ihien we kpu node kume oku; ya wu ihien node me we gbu ndi hu ile ju ni efeko w'a.

16 Eje-anu hun-eboni nozi me we ye ihian ile ahima eka-nni mobu ezimezi-ihun—ke ndi uku ke

ndi nta, ke odafin ke ogbenye, ke igbon ke onye nwon enwen e—

¹⁷ nke wu ni onye owule we yeleni ahima hu a saeka non mobu re ihien owule. Ahima hu wu efan eje-anu ibuzo hu mobu ahima hun a nokin enya efan a.

¹⁸ Onwan cho amamihiem: onye owule nwon nghota ya gi e gbako ahima eje-anu hu, makeni ahima ihian ro. Ahima hu wu isin kwasị ogun-mmẹtọ kwasị nnu*.

Isi Nke Mmẹtọ

Nwa-ebulu Hu Le ndi Nke E

¹ E lezi m enya, m no hun Nwa-ebulu hu k'o turu elu Ugu Zayonu—ya le madu nnu ogun-mmẹsato we deye efan a le efan Nedi e ezimezi-ihun we.

² M no nuzi olu gha enu-igwee bia. Oluni ri a han ke uzun oken-mirin ri e huni le uzun akpabo hankenmeni. Olu hu m nu rizi ke ebe ndi a kpọ ubo ri a kpọ ubo we.

³ Madu nnu ogun mmẹsato ahun hu a bu ebụ ohun ihun ukpo hu le ihien eno hu ri ndun le ndi-isi hu. O nwonna onye ozo saeka munrun ebụ hu wezuka madu nnu ogun-mmẹsato hu we gha ime uwa gbapuha.

⁴ Ndinị wu ndi hu gileni ikpoho meru enwen we; we wu ikennyemarinleni ikpoho. W'e son Nwa-ebulu hu ebe owule o jenkọ. Osolobue le Nwa-ebulu hu a ghaguọ ime ihian ile gbari ndini noke mkpuru-ibuzo.

⁵ Anutuni we ntu onu we; enwon we ntupo.

* **Isi Nke Mmẹtọ:18** “666” ke w'a kpọ a Onu-ebo.

Ndi Mmọn-ozì Eto Hu

⁶ M nọzi hụn mmọn-ozì ọzọ hụn feko ime enu, ime elu-igwee. O gi ozioma itebite hụn o k'e zi ndi ile bi elu-ụwa—ya wụ, ndi ali ọwule le ebọn ọwule le ndi a sụ asusu ọwule le ndi ọwule.

⁷ O nọ gi oken olu si, “Tụ ni egun Osolobue, onu e ye e ogho, makeni ogen o k'e gi kin ikpe e ruguo. Eghẹ, fe ni Onye hụn ke enu-igwee le ụwa le ohimin le isi-mirin ri ichen-ichen!”

Babilon' A Daan!

⁸ Mmọn-ozì ọzọ, hụn me e ebuo, nọ fuha, a si, “O danguo! Babilonu uku hu a danguo! Okpoho hu hụn me ndi ali ile ra manya a, manya a hụn zeni, manya ughere e!”

Afunfun Ri E Che Ndi K'a Narin Ahima Eje-anu Hu

⁹ Mmọn-ozì ọzọ, hụn me we eto, nọ puha, gi oken olu yiko, “Onye ọwule hụn fe eje-anu hu le udi a we kpụ, narin ahima a ezimezi-ihun mobu eka we,

¹⁰ jenkọ d'a razikwo manya hu zeni, manya iwele-onuma Osolobue, hụn we gburoleni—hụn we huye ime mkpu iwele-onuma a. We k'e gi okun le nsin-enya-anwun ye we eje-afunfun id'anya ndi mmọn-ozì ri nsọ le id'anya Nwa-ebulu hu.

¹¹ Enwunrun okun we gi ri e ye we eje-afunfun we k'a ri ime e k'a gha a loshi elu jenin ejen. Ke uhinhin ke efinnai, izu-iken arikonni ndi hu siko d'e fe eje-anu hu le ihien we kpụ ke iya, uwe le onye ọwule narin ahima efan a.”

¹² Onwan cho ndidi eka ndi nsọ, ndi hụn e mesonme ihien Osolobue ku, e kwerikenme ni Jizosi.

13 M nọ nụ olu gha elu-igwee sị, “De ọnwani: gha ogenni jẹnme, ngozi jenkọ d'a rini ndi hun k'a nọ ime Di-nwonnini-enyi nwunhun!”

“Eghee, ndi we gozi agozi ke we wu nke-esi! We k'e zu iken orun we, makeni ihien we runpuha ri e son we!” Iya ke Mmọn-nsọ ku.

A Ghorị We Mkpuru Uwa Mi

14 Ya m nọ lee enya, m nọ hun orukpu ochan. Onye nọdi ali elu orukpu hu nọ ke Nwa nke Ihian. Okpu-eze goru ri a isi. Opią gorini tuni w'a kpọ Siku, hun we gi a gho mkpuru hu a eka.

15 Mmọn-ozị ọzọ nọ gha ime Unọ-nsọ puha, gi oken olu hijenni onye hu nọdi elu orukpu, sị a, “Gi nwan siku i ghorị mkpuru, ni ogen e ruguo w'e gi ghorị mkpuru, makeni mkpuru uwa mi a kachanringuo.”

16 Ya onye hu hun nọdi enu orukpu nọ fe opią-siku a ye elu uwa, ghorị mkpuru uwa mi.

17 Mmọn-ozị ọzọ nọ gha Ulo-nsọ hun ri elu-igwee fuha, ya nwen gizikwo opią-siku tu-nko.

18 Ya Mmọn-ozị ọzọ nọ gha ukpo nchu-ẹjan puha. Onwan wu mmọn-ozị hu hun Osolobue we oku owule gbashari okun che okpuru e. O nọ weshi olu elu, hijenni mmọn-ozị hu gi opią-siku tu-nko, sị a, “Gi nwan opią-siku i tu-nko ghorị ohio-grepu hun vaini uwa mi, makeni grepu e a changuo!”

19 Ya mmọn-ozị hu nọ fe opią-siku a ye elu-uwa, ghorị grepu ri uwa, tu a ye ebegu hi-ogbe hun Osolobue nọ a ghosị iwe-le-onuma a—ebegu o nọ a pinpuha manya grepu e.

20 We nọ gha ime obodo hu pu, shi ebegu d'a pinpuha manya grepu hu. Edeke nọ gha ebahun we

nọ a p̄infuha manya e hupuha. O ru ẹdeke ahun e ru ihian isi-uvun; ẹshin banye ime ẹ, o ru ẹ onu; o d'e huru ihien nọkẹ maill' isen kwasì ogun-itenei.

Isi Nke Mmisen

Nsongbu Ikpazuun Eṣa E D'e Bidon

¹ Ya m nọ hunzi oken ahunlele ozo pu-ichen ime elu-igwee; onwan a tūkenmẹkẹ ẹnya: mm̄on-ozì ẹsa gi eje-afunfun ẹsa! Eje-afunfun ẹsanì wu ndi ikpazuun. Uwe kẹ iwe-ḷe-onuma Osolobue k'e gi bi.

² M nọ hun ihien nọ kẹ ohimin ughegbe wẹ gwagbama ya ḷe okun, hunzi ndi hu meri eje-anu hu ḷe ihien hu wẹ kpọ kẹ ya—ḷe ahima nomba hu hun a nokin ẹnya ẹfan a. Ndinì wẹ turu mkpenren ohimin ughegbe hu. Wẹ gisonmẹ ubo Osolobue ye wẹ.

³ Wẹ hu a bu ẹbu odibo Osolobue wu Mozizi ḷe ẹbu Nwa-ebulu hu,

“Euu Chuku Nna,
Onye hun nwon iken ile!
Y'e mekẹ oken ihien ḷe ihien a tu ẹnya!
Euu, Eze anì ile ḷe agbo ile!
Iri-ochan ḷe ezioku kẹ i gi e me ihien i.

⁴ Euu Nna,
onye k'a si n'ọ tuko egun i,
n'ọ jako ẹfan i mma?

Iyu suo ri nsọ.
Ali ile k'a bia d'e fe i,
make ni y'a hanguo enen
hun ghosi n'i ri-ochan.”

⁵ Onwan e meguu, m nọ hun Ulo-nsọ (Odu-nkwerigbama ahun, Odu Ashia-eri ahun, wẹ nọ e fe ofufe) hun ri elu-igwee. Wẹ gunpu a agunpu.

⁶ Ndi mmọn-ozì ẹ̀sà hụ̀ gí eje-afunfun ẹ̀sà hụ̀ nọ́ gha ime Ụ́lọ́-nsọ́ pụ́ha. Wẹ́ yisọnme ẹ́kwa line nwunni, hụ́n rị́ e gbukeni. Wẹ́ ile gisonme ihien goru kenhunme obi we.

⁷ Ime ihien eno hụ́ rị́ ndun, ohu nọ́ ye mmọn-ozì ẹ̀sà hụ̀ aferẹ́ ẹ̀sà wẹ́ gí goru memẹ́. Ihien jun aferẹ́ ndi hụ́ wu iwe-le-onuma Osolobue, Onye hụ́ rị́ ndun jenin ejen.

⁸ Enwunrun gha ogho Osolobue le iken e a lofuha nọ́ jun unọ́-nsọ́ hụ́; o nwonzini onye saeka banye Ụ́lọ́-nsọ́ hụ́ d'e ru ni eje-afunfun ẹ̀sà hụ́ mmọn-ozì ẹ̀sà hụ́ gí e bi.

Isi Nke Mmisin

Eje-afunfun Ẹ̀sà Ịkpazuu!

¹ Ya m nọ́ nụ́ ke oken olu gha Ụ́lọ́-nsọ́ gwa ndi mmọn-ozì ẹ̀sà hụ́ oku, si we, “D'e hu ni iwe-le-onuma Osolobue rị́ ime aferẹ́ esani kpu elu-ụ́wa.”

Ẹ́tẹ́ Hụ́n E Shinni, A Turu!

² Ya mmọn-ozì ibuzo nọ́ jen d'e hu ihien rị́ ime aferẹ́ a ye enu-ụ́wa, eje-ete hụ́n e shinni, hụ́n a turuni, nọ́ jun ndi hụ́ ehụ́, ndi ahun bu ahima ejenanu hụ́ le ndi hụ́ fee ihien we kpu ke iya.

Ihien Ile Rị́ Ohimin A Nwunhun!

³ Mmọn-ozì nke ebuo nọ́ hu ihien rị́ ime aferẹ́ a ye ime ohimin, mirin rị́ ime ohimin nọ́ rị́ ke edeke onye nwunni. Ihien owule rị́ ndun ime ohimin nọ́ nwunhun.

Iyi Le Isi-mirin E Henrin Edeke!

⁴ Mmọn-ozì nke eto e hu ihien rị́ ime aferẹ́ a ye ime iyi le isi-mirin risonme ụ́wa, we nọ́ henrin edeke.

Osolobue Ri E Ye Afunfun Furuni!

⁵ M nọ nụ kẹ mmon-ozì mirin ile rì ẹka a sị,
 “Euu Onye-nsò,
 onye hùn rì kíkènni, hùn rìzìkwọ mbu.
 Ezigbo eñen kẹ y'a han!

Y'a haìn
 i gi e yesonmẹ wẹ afunfun ndìnì.

⁶ Makèni e gbuguọ wẹ
 ndì-nsọ lẹ ndì-amụma,
 y'e yeguọ wẹ ẹdeke ra!
 Ihiẹn wẹ cho
 kẹ wẹ rì nwan a hùn!”

⁷ M nọ nụ kẹ ukpo nchụ-ẹjan shiari, sị,
 “Egheẹ, Osolobue wu Di-nwonnì-ẹnyi,
 Onye nwon iken ile,
 ikpe i ma wẹ hụ mma,
 ezigbo eñen kẹ y'a han!”

Anwun E D'a Magbu We!

⁸ Mmon-ozì nke ẹnọ nọ hu ihien rì ime afere a kpu
 ẹnya-anwun, gi ẹ mẹ anwun ma ihian oda-oda.

⁹ O makemẹkẹ wẹ—kanì, hùn nkẹ w'e gi gbe-
 huto, mebehi njo, wẹ nọ kpoma Osolobue hùn rì e
 zihẹ afunfun ndìnì wẹ iyi. E yeni w'ẹ ogho.

Ishi E Kpume We!

¹⁰ Mmon-ozì nke isen nọ hu ihien rì ime afere a
 ye ukpo-eze eje-anu hụ, ali-eze eje-anu hụ nọ gba
 ishi, wẹ nọ tamade ire wẹ * make oken-ufu wẹ rì
 ime ẹ;

¹¹ wẹ nọ kpoma Chuku rì elu-igwee iyi make ufu
 lẹ ete rì wẹ ehụ—egbehutonì wẹ obi mēbehi eje-
 ihien ndì wẹ rì e mē.

* **Isi Nke Mmisin:10** “tama nkwenren-eze”

Iyi Yufretis' A Tahı, Henrin Uwaya!

¹² Mmõn-ozı nke ısın e hu ihien ri ime afere a ye iyi uku hu wu Yufretisi, mirin e no tahı, gi beyeni ndi-nze jenkõ d'a gha azuun owuwa-nya-anwuun bia uzõ.

Eje-mmõn Eto Hun E Dufie Ndi-nze!

¹³ M no hun eje-mmõn etõ risonme ke ewõ ke we gha onu Dragonu, onu eje-anu hu, le onu onye amuma-ntu hu pula.

¹⁴ Ndinı wu eje-mmõn ndi a runsonme orun-atumenya ri ichen-ichen, uwe e jen d'a kpoqbama ndi-nze ile ri uwa make agha we jenkõ d'a lu Uhuõhin nke Osolobue, Onye hun nwõn iken ile.

¹⁵ (Jesu si, “Lee e! M jenkõ d'a bia idumuzi noke ohin. Ngozi jenkõ d'a rinı onye owule k'a munrun nya, e che, amangbe w'a tonarin a ekwa a, amangbe õ gba õto a ghahunme, a hun we ihien ifenren e”!)

¹⁶ Eje-mmõn etõ hu no kpõkwama ndi-nze, we ile no zu ebuhu w'a kpõ 'Amagidonu. 'Amagidonu ke w'a kpõ a onu Hibru†.

Ali-õmahie Jogbu Enwen E!

¹⁷ Mmõn-ozı nke esa e hu ihien ri ime afere a ye ime ufere, oken olu no gha ukpo-eze hu, ime Ulonso, si,
“O gũgũõ!”

¹⁸ Amuma no besõnme, mirin no densõnme, akpabõ no hansõnme, ali no mahihie õda-õda. Udi ali õmahihieni e metuni kete we bimele uwa; õ mahihiekẽnmeke!

† **Isi Nke Mmisin:16** I kpõchanrin a, “Ha-magidonu” ro, hun wu “Ugu Magidon”.

19 Obodo uku hụ nọ kebe ụzọ ẹtọ; obodo shia ẹfọ hụn risonme alị ile nọ tikpochanrin. Osolobue a nyanhan Babilon' uku hụ, o nọ we mkpu-manya iwe-le-onuma a ye ẹ ra.

20 Alị ile mirin nōhunme e fopu; ahunzikwoni we ugu owule.

21 Eregede ekwan-igwee nyinhan ke ekpa simenti hụ a gha elu igwere a dankwasị ihian—d'e ru ni a buma we Osolobue onu make afunfun hūn ekwan-igwee hū rị a dannị rị e buhe ni we. Afunfun hū a jokenmeka njọ!

Isi Nke Mmṣa

Oken Igbaraja Hụ Le Eje-anu Hụ

1 Ya mmōn-ozī ohu ime we ẹsa hū gi afere nọ bia d'e kunrun m, si m, “Bia, ni m ghoṣi i ikpe-omuma le afunfun jenkọ d'a rinị oken igbaraja hū hūn nōdị alị enu iyi bu oda;

2 oken igbaraja hū ya le ndi-nze uwa wi me mgba, hūn mgba a we me tugbariguu ndi bi elu-uwa leke manya.”

3 Ya mmōn-ozī hū nọ buru m ime mmōn shi ime atu, m nọ hūn okpoho nōdị anị elu eje-anu e nwun ufie-ufie. We dejun eje-anu hū ẹfan ichen-ichen hūn e kutọ Osolobue ẹhū. Isi ẹsa le mpin iri ke eje-anu hū nwe.

4 Okpoho hū yi ewuru nanran oda-oda hūn e nwun ufie-rōnị, ufie-rōnị le ufie-ufie. O yi ihien-mma rị ichen-ichen: ke goru ke ejije le ihien-mma ndi ozo—ke ihien mma we gi omuma hūn a kōnị memẹ. O gizi mkpu we gi goru memẹ ẹka. Ihien runi le ihien ru unyin ya le igbaraja wi jun mkpu hū.

⁵ O nwe ẹfan we de ye ezimezi-ihun e. Ali ẹfan ahun e miḳe. Ẹfan hu wu:

“Babilon' Uku, Nne Ndi-igbaraja Le Ihiẹn Ile Runi Ri Ime Uwa.”

⁶ M no hun a ni edeke okpoho hu ra, edeke ndi-nsọ le ndi we gbu make eri we shia ni Jizosi, ri a tu a ke manya.

Ogen m gi hun a, o tikenme m ẹnya!

⁷ Kani, mmon-ozu hu no si m, “K'o ri a tuni i ẹnya? M k'a kowa ni ihiẹn okpohoni le eje-anu isi esa le mpin iri hu bu n'e wu.

⁸ Eje-anu hu i hun te ri ari mbu, bu o rizi a nwan—kani, o d'a gha ime eje-mgbugbu hu migbu enwen e puha. O puhagu, o k'a la ntikpo. Mgbe ndi hodu enu-awa—ndi ahun ile we deyeleni ẹfan we ime ehuhuo nke ndun ni Osolobue d'e gbe iyeto uwa—k'e gi hun ke eje-anu hu puhazi, o k'a tu we ẹnya, makeni o te ri ari, bu o rizi a nwan, kani o lalazi alala.

⁹ Onwan cho amamihien le nghota.

Isi esa hu wu ugu esa okpoho hu nodi elu we; we wuzikwo ndi-nze esa.

¹⁰ Ime ndi-nze esa hu, isen a danguo; ohu ri nwan a ki; ozo ri n'a e ke bia. Kani, o bia, o k'a tohu ekere suo.

¹¹ O me nke eje-anu hu hun ri mbu bu o rizi a nwan, iya wu eze hun k'e me we ndi-nze esato, bu onye ohu ime we esa ro—makeni o k'a kizi. Kani, ogen o k'e gi fuhazi, o k'a lazikwo ntikpo.

¹² Mpin iri hu i hun wu ndi-nze iri hun we keleni kin eze. Kani we k'e kin we eze, a ki we ekere suo, mgbahunme okuloku ohu, uwe le eje-anu hu.

13 Ihiẹn ohu kẹ wẹ iri bu obi—wẹ iri k'e kwerigbama, we okiki wẹ ye eje-anu hụ n'ọ kịma.

14 Wẹ k'a lụson Nwa-ebulu hụ agha, kani, Nwa-ebulu hụ k'e meri wẹ, makeni iya wu Nna ndi-nna le Eze ndi-nze, makeni ndi ya le wẹ wi wuzikwo ndi *Chuku* kpọ, ndi ọ hori ahori, ndi wẹ gi e don enya.”

15 Mmon-ozu hụ nozi si m, “Miri ndi hụ i hụn, hụn igbaraja hụ ndi ali elu wẹ wu ndi ri ichen-ichen, igunrun ihian ri ichen-ichen, ali ri ichen-ichen le asusu ri ichen-ichen.”

16 “Nke mpin iri hụ i hụn, ize igbaraja hụ k'a ban uwe le eje-anu hụ; wẹ k'e ti e iwi—napucharin a ihien owule—gbari a otọ, ripu uru-ehụ a, kpọ a okun.

17 Makeni, Osolobue e buguọ ihien ọ cho n'o me che wẹ ime obi, keni wẹ me e, ghahani ikwerigbama wecharin ani-eze wẹ le okiki wẹ ye eje-anu kima, d'e ru ogen oku Osolobue e gi mezucharin.”

18 “Nke Okpoho hụ i hụn, iya wu obodo uku hụ hụn a kicharin ndi-nze ri uwa.”

Isi Nke Mmesato

Babilon' A Daan!

1 Onwan e meguu, m no hụn mmon-ozu ozọ k'ọ gha elu-igwee hidanla. Mmon-ozu hụ nwon iken o gi e me ihien bu oda; ọ banhan, uwa ile no nwun make ogbo ri a ehụ hụn ri e ti kẹ ukpe.

2 O no gi oken olu si,

“O danguọ! Babilonu uku a danguọ! O wuruole ebe eje-mmon ri ichen-ichen bi; ebe mmon owule runi bi; ebe nnunu owule runi bi; [ebe anu owule runi, hụn e ze ize bi].

³ Makēni, ndị anị ile a raọle manya a; ọ tugbuguọ wẹ—manya a hụn wụ ughere le ihien-ọlila-nya. Ndi-nze ri uwa e meguo mgba a. Ndi-afia uwa e giguo aku-le-uba a gha obibi ehụ-ufu le eje-obibi e henrinsonme ndi-idafin.”

⁴ Ya m nọ nụ ke olu ozo gha elu-igwee si,
“Ndi nke m, gha ni ime e puha, amamgbe unu e bu aka che ime njo a, amamgbe unu e son e narin afunfun rini n'a;

⁵ makēni, enumenu njo a e ruguo enu-igwee; Osolobue a nyanhanguo njo a.”

⁶ “Me e ihien o me ndi-ozo! Megwari a ya uzo ebuo! Gbaye e manya k'o don gbaye ndi ozo—y'a gbayedee e ya uzo ebuo!

⁷ Ye e afunfun le ekwan hun han ke ogho o ye enwen e le obibi ehụ-ufu o bi.

Ebe o me ni o si enwen e, ‘Mme ri a ki, mme wu eze-okpoho; di anwunnahinni m, ihien-ekwan emeko m!’

⁸ Ya wu, afunfun ile rini n'a k'e gi enya-anwun akp'ohin ohu biachanrin—ke onwun, ke ihien-ekwan, ke unwun. We k'a kpọ a okun. Eghere, makēni Chuku-Nna, hun ri a ma a ikpe wu diken.”

⁹ Ndi-nze ri uwa hun meguu mgba a, son e bi obibi ehụ-ufu, k'a kwan n'a ekwan, gon'e—ogen w'e gi hun enwunrun okun we kpọ a.

¹⁰ Egun afunfun o ri ime e aniko we nokunme e. We k'e turu ebe teni, a si,

“Lee o! Lee o!

Lede obodo uku hu-o!

Obodo uku wu Babilonu!

Afunfun we ye e e gi ekere ogen suo,

mgbahunme okuloku ohu,

bịachanrịn!”

¹¹ Ndi-afia uwa k'a gha a kwan n'a ekwan, sụkuru, makeni o nwonzini onye e nonnarin we ibu-afia we—

¹² goru, ọla (siva), ejije le ihien-mma ndi ozọ le omuma ndi akoni w'a cho a cho we gizi a cho ihien mma; ekwa line, ekwa popu nanranni, ekwa Siki le ekwa ufi; udi osisi ile e shin ohunma le ihien ile ri ichen-ichen we gi aivri wu eze-enyi memem; udi ihien owule we gi osisi sitron hun a nanranni le igwe bronzu le igwe mmaka le mabulu memem;

¹³ sinamonu le ihien ndi ozọ ihien-oriri gi a suo; nsensi le maa le Frankisensi; manya, uden-olivu, oka we gwe nanranni le oka-witi; efin, atunrun, eshin le ugbo-anyinyan; igbon le umen-dun ihan.

¹⁴ Ndi-afia hu k'a si a,

“Thien ile ri mma ri a nagbu i enya a nahinguo i! Ihien ile ehugie e fu i le ogho i ile e hunahinguo i! Y'a hunkozi we jenin ejen!”

¹⁵ Ndi hun a zu afia ihien ndini, hun gi afia uwe le ya a zu hi odafin k'e turu ebe teni a kwan ekwan —egun afunfun o ri ime e aniko we nokunme e—we k'a kwan ekwan, e goo, a si,

¹⁶ “Lee o! Lee o! Lee obodo uku hu, hun yi ekwa line nanranni le ekwa popu nanranni le ekwa ufi, hun yi ihien-mma nanranni jun ehugie—ke goru ke ejije le ihien mma ndi ozọ we gi omuma a koni memem!

¹⁷ Aku-le-uba hu ile e gigo nwan ekere ogen suo, mgbahunme okuloku ohu, lachanrin iwi!”

Ndi-isi ugbo-mirin ile le ndi ile e gi ugbo-mirin e jen le ndi a run ime ugbo-mirin le ndi owule e gi ugbo-mirin a zu afia, no turu ebe teni,

18 e yi oro—ogẹn wẹ gi hun ẹnwunrun wẹ gi kpọ a ọkụn—a sị,

“Elee obodo nọ kẹ obodo ukuni?”

19 A buọ wẹ uzunzun ye isi, a kwan, e goo—a sị,

“Lee-o! Lee-o! Ledẹ Obodo uku hụ ndi ile nwon ụgbọ-mirin ime ohimin gi akụ-le-uba a hi ọdafi! E gi wẹ nwan ekere ogẹn, mgbahunme ọkụlọkụ ohu, tikpofu a!”

20 Euu elu-igwee, ghoghoma n'ọ dangụ! Unu ndi-nsọ le ndi-ozu pu-ichen le ndi-amuma, ghoghoma ni n'ọ dangụ! Make ni, Osolobue e giguọ ufiri onu ma a ikpe!

21 Ya mmon-ozu ohu kin-akwanran oda-oda nọ buru ọlọ hi-ogbe, tu a ye ime ohimin, sị,

“Enina kẹ wẹ jenkọ d'e gi gi eka-iken tu obodo uku hụ wu Babilonu ye ali; ahunkozi w'a!”

22 “Anukozi wẹ olu ndi-ubọ le olu ndi oku-ebu le oku-ekpiri le oku-opi ime i;

ahunkozi wẹ onye orun-nka owule ime i;

anukozi wẹ ukwere ọlọ ime i;

23 ukpe-eka enwunkozi ime i;

anukozi wẹ olu ighoghọ ndi ri a gba ehuhuo ime i.

Onwan k'e me make ni ndi-afia i gi ndi-uku uwa wẹ wu wiwi ihien, o k'e me make ni y'e giguọ eje-iken i me ndi ali ile kẹ i me wẹ, dufiechanrin wẹ.

24 Eka a kẹ wẹ nozi hun edeke ndi-amuma le ndi-nsọ le ndi ile wẹ gbu ime uwa.”

Isi Nke Mmitenei

A Ghoghoma Wẹ Elu-igwee

1 Onwan e meguu, m nọ nu oken uzun ime elu-igwee, hun nọ kẹ olu igunrun hi-ogbe; wẹ hụ a

si, “Ija-mma ya riñi Osolobue! Nzuopuha le ogho le iken wu nke Osolobue enyi!”

² Makeni ezioku k'o gi a han enen; o han ezigbo enen. O magu oken igbaraja hu ikpe, igbaraja hu gi ughere e meru uwa. Osolobue e yegu a afunfun make edeke ndi idibo Osolobue o gbu, gi megwari a ihien o me we.”

³ We no siji, “Ija-mma ya riñi Osolobue! Enwunrun okun we kpọ igbaraja ahun hu a loshi enu jenin ejen!”

⁴ Ndi-isi eno kwasị ogun hu le ihien eno hu ri ndun no dan ali, fe Osolobue hun nodi ani elu ukpo-eze hu, si, “Isee! Ja ni Osolobue mma (Aliluya*.)”

Oriri-agbamehuhuo Nwa-ebulu Hu

⁵ Olu no gha ukpo hu si, “Ja ni Chuku enyi mma, unu ndi idibo e le ndi ile a tu egun e—ke ndi uku ke ndi nta!”

⁶ Ya m no nu oken olu hun no ke olu igunrun hi-ogbe mobu oken mirin ri e huni le oken akpabo. Olu hu ri a si,

“Ija-mma ya ri ni Osolobue—

Aliluya! Makeni Di-nwonna-enyi wu Osolobue enyi, onye hun nwe iken ile, ri a ki!

⁷ Ni enyi ghoghoma ni, ni enyi nanma ni; ni enyi yeme e ogho, makeni agbamehuhuo Nwa-ebulu hu e rugo; nwa-agbo o k'a lu a kwademegu enwen e.

* **Isi Nke Mmitenei:4** “Aliluya” wuzi “Ja ni Osolobue mma!”

⁸ A nịgụọ wẹ nwa-agbọọ hụ yiri ẹkwa line n'anranị, hụn rị e gbukeni, hụn nwonlẹni nkaru"—makeni ẹkwa line hụ rị a ghosị orun oma ndi nke Osolobue run.

⁹ Mmon-ozì hụ nọ sị m detu onwan:
 “Ngosì a rikakwo nì ndi hụ wẹ kpọ oriri agbamehuhuo Nwa-ebulu hụ.”

O nozi sị m, “Ihienni wu oku Osolobue nke-esi.”

¹⁰ Ya m nọ dan alì uku a, keni m fe ẹ, kanì o nọ sị m, “Emekwole a! M wuhu odibo rike yu le umune i ndi kwondon oku Jesu. Fee Osolobue! Makeni, ihien Jesu ku, iya wu alì ihien ile ndi-amuma ku.”

Onye Hụn Nyinko Eshin Ochan

¹¹ Ya m nọ hụn ke elu-igwee kpupu, a hụn m eshin ochan ebẹhu; efan onye rị e nyinn'e wu “Onye-wegidon-nya le Ezioku.”

O han enen zinrinni, a lu agha zinrinni.

¹² Enya a hụ e nwun ke ire-okun. Okpu-eze bu oda rị a isi. O nwonzikwo efan wẹ de ede hụn o me ni o nwonni onye marin n'a wezuka ya le enwen ẹ.

¹³ O yi ewuru wẹ yoye ime edeke. Efan wẹ gi marin a wu Oku Osolobue.

¹⁴ Ndi-agma enu-igwee ile nyinko eshin ochan sonko a. Ewuru wẹ wu ezigbo line ochan, hụn nwonlẹni nkaru.

¹⁵ Opi-agma tuni gha a onu suepuha, hụn o jenkọ d'e gi meri ndi alì ile. O jenkọ d'e gi okpo-igwe ki wẹ. O k'a zokpukpo wẹ ke ihian don a zo akpuru vaini: ebẹhu Onye ahun nwon iken ile wu Osolobue nọ a ghosì oken iwe-le-onuma-a k'o k'a nọ zo wẹ.

¹⁶ Nzere wẹ deye elu ewuru ẹ le ogbodogbo a wu
 “Eze ndi-nze le Nna ndi-nna.”

Jizọşì E Meri Eje-anụ Hụ Lẹ Onyẹ Amụma-ntụ Hụ

17 Ya m nọ hụn mmọn-ozì ohu k'ò turu ẹnyanwun, ọ nọ gi oken olu kpọ nnunụ ile e fe elu-igwere oku, sị wẹ, “Bia nị-o! Gbakikome ni d'e ri oriri uku Osolobue kpọ-o!”

18 D'e ri ni anụ ndi-nze lẹ ndi-ndu-agma uku lẹ ndi-uku; anụ eshin lẹ ndi te ri e nyinni wẹ; anụ ihian ile—kẹ ndi nwon enwen wẹ-o kẹ igbon-o; kẹ ndi uku-o kẹ ndi nta-o!”

19 M nọ nwan hụn eje-anụ hụ lẹ ndi-nze uwa lẹ ndi-agma wẹ ebe wẹ gbakikome ni wẹ d'a lusun onyẹ hụn ri e nyin eshin hụ lẹ ndi-agma a ogun.

20 Kani wẹ nọ nwundon eje-anụ hụ, ya lẹ onyẹ amụma-ntụ ahun te ri a rundon ni eje-anụ hụ orun-atumenya—hun gi orun-atumenya ndi hụ dufie ndi hụ narin ahima eje-anụ hụ lẹ ndi hụn fe ihien wẹ gi udi a kpụ. Wẹ nọ tu wẹ ebuo ebe wẹ ri ndun ye ime omi ahun okun ri, hụn okun a gi nsin-enyanwun a dun.

21 Wẹ nọ gi opia-agma onyẹ hụn ri e nyin eshin ochan gbupu ndi hoduni—opia-agma hụ gha onu a apuha; nnunụ ile nọ gi anụ wẹ rijunchanrin efo, righafe oken.

Isi Nke Ogun

Ahụa Ogun-iri Kwasì Nnunaì Hụ

1 Ya m nọ hụn mmọn-ozì ohu k'ò gha elu-igwee hidanla, ọ gi ishanhan eje-mgbugbu hụ migbu enwen e lẹ egan hi-ogbe.

2 Ọ nọ nwundon dragonu hụ, agwo mbu-mbu hụ wu Ekwensu, hụn wuzikwo Setani, ken e egbun

jenko d'a to ahua ogun-iri kwasi nnunai, hun wu ahua nnu-uku;

³ O no tu a ye ime eje-mgbugbu hu migbu enwen e, kpokin eje-mgbugbu hu, fidon e—amamgbe o dufiezi ndi ani ri ichen-ichen. We k'e donme e ebefu d'e ru ni ahua ogun-iri kwasi nnunai hu e zu. Ohun meguu, we k'a hatuziri a ekere ogen.

⁴ Ya m no hunsomme ukpo-eze; we no tume ndi hun nodisonme ani enu we ndi k'a han enen. M no hunzikwo umen-dun ndi hu we gi ifiri eri we shia ni Jizosi le ifiri oku Osolobue befu isi. Ndinu ju ni efeko we eje-anu hu mobu ihien hu we gi udi a kpu, juzi ni anarinko we ahima eje-anu hu ezimezi-ihun we mobu aka we. We no nwan gha onwun lihi, rizi ndun, son Kraisti ki ahua ogun-iri kwasi nnunai hu, ahua nnu-uku.

⁵ (Ndi ozon nwunni aghani onwun lihi d'e ru mgbe ahua ogun-iri kwasi nnunai ahun gi zuguu.) Onwan wu igha-onwun-lihi nke ibuzo.

⁶ Onye we gozi agozi le onye ri nso ke onye owule k'a ri ndi k'a gha onwun lihi nke ibuzoni wu. Onwun nke ebuo enwon iken ebe ndini ri—anwunko we onwun nke ebuo. Kama, we k'a wu ndi nchu-ejan Osolobue le Kraisti. We k'e son Kraisti ki ahua ogun-iri kwasi nnunai.

Nke Ekwensu A Guu!

⁷ Ahua ogun-iri kwasi nnunai hu zuguu, a topu we Ekwensu, gha ime ngan o ri wepuha a.

⁸ O k'a pu d'e dufie ani ndi risomme ebamin-enon uwa, Gogu le Magogu ke w'a kpo we. O k'e wegbama we d'a lu agha. E bukenmekwe we oda: we no ke ejan ri ohimin.

⁹ Wẹ nọ ghakwọrị ebe wẹ rị fetu alì ichen-ichen rị elu-ụwa* bịa d'e fihunmẹ ebe ahun ndi nke Osolobue rị (ago wẹ) lẹ obodo ahun rị Osolobue obi; kani, okun nọ gha enu-igwee hidan, bu wẹ ile ri.

¹⁰ Wẹ nọ tụ Ekwensu hun dufieni wẹ ye omi okun lẹ nsin-anya-anwun hu—ebehu eje-anu hu lẹ onye amuma-ntu hu rị. Wẹ k'e ye wẹ afunfun uhinhin lẹ efinnai jenin ejen.

Okinkin-ikpe Ikpazuun

¹¹ Ya m nọ hun ukpo ochan ohu hi-ogbe lẹ onye hun nodi alì elu e. Uwa lẹ elu-igwere nọ gha ebe o rị gbafu, o nwonzini ebe wẹ k'a nodi.

¹² M nọ hun ndi nwunni ke wẹ turu ihun ukpoeze hu—ke ndi-uku ke ndi-nta. E kpupusonmẹ wẹ ehuhuo bu oda; ya wẹ nozi kpupu ehuhuo ozo, hun wu ekukwo nke ndun. Wẹ nọ gi ihien onye-onye me kin ndi hun nwunni ikpe—ke wẹ don detosonmẹ wẹ ime ehuhuo ndi hu.

¹³ Ohimin nọ wepuha ndi-nwunni rị ime e, Onwun lẹ Ali-mmọn nọ wepuhazikwo ndi-nwunni rị ime wẹ. Wẹ nọ gi ihien onye-onye me kin e ikpe.

¹⁴ Ya wẹ nọ tụ Onwun lẹ Ali-mmọn ye ime omi-okun hu.

Omi okunni wu onwun nke ebuo.

¹⁵ Onye owule wẹ hunleni efan a ime ekukwo nke ndun, a tu wẹ onye hu ye ime omi-okun hu.

Isi Nke Ohu-kwasi-ogun

Elu-igwee Ohun Lẹ Elu-ụwa Ohun

* **Isi Nke Ogun:9** ledẹle Habakoku 1.6

¹ Ya m nọ hụn elu-igwee ọhụn lẹ enu-ụwa ọhụn, makeni elu-igwee ibuzọ lẹ elu-ụwa ibuzọ a lagụọ. Ohimin arizị a.

Jerusalem' Ọhụn

² M nọ hụn obodo-nso hụ, Jerusalem' ọhụn hụ, k'ọ gha enu-igwee hidanla, Osolobue zihę ę. Ọ rị ke nwa-agboọ wẹ chọguu mma, hụn rị e che di ę.

³ M nọ nụ oken olu gha ebe ukpo-eze hụ rị a sị,
“Lee ę, ebe-obibi Osolobue a biaguọ ime igunrun ihian; o k'e bi ime igunrun wẹ. Wẹ k'e fee ę ni uwẹ wụ ndi nke ę; [Osolobue k'e mę wẹ ni ya wụ Osolobue wẹ]—Osolobue lẹ enwen ę k'a nọyeni wẹ.

⁴ O k'e finchanpuchanrin wẹ ęnya-mirin ọwule rị wẹ ęnya. Ọnwun arikozi; ke ihien ęnya-mirin ke ekwan ke ufụ arikozi—makeni ihien akan a ghafeguọ.”

⁵ Onye hụ nọdi anị elu ukpo-eze hụ nọ sị,
“Lee ę! M rị e kedonzi ihien ile!”

Ọ nọ sịzi, “Detu ihienni, makeni oku ndini wụ ezioku lẹ oku furu wẹ gi e don ęnya.”

⁶ Ya ọ nọ sị m, “O meguọ! Mmę wụ Ibusọ lẹ Ikpazụn, Mbidon lẹ Ogugu. Onye ọwule egun-mirin rị a gun, m k'a gha isi-mirin hụ mirin e ye ndun gha e hupuha ye ę mirin ofe.

⁷ Ndi hụn merini k'e nwehen ihien ndini m k'e ye. M k'a wuru Osolobue wẹ, a wuru wẹ umu m.

⁸ Kani, nke ndi a tu egun lẹ ndi-kwerileni lẹ ndi runi; ndi-izighe lẹ ndi-ughere; ndi ile e bu-nshin lẹ ndi gi iken eje-mmọn a run; ndi a rua mmọn lẹ ndi-ntu ile—wẹ ile shiko d'a rị ime omi okun lẹ nsin-ęnya-anwun hụ, hụn wụ ọnwun nke ẹbuọ.”

Jerusalem Ọhụn Hu

9 Ya mmọn-ozì ohu ime wẹ ẹsa hụ te bu afere afunfun ikpazuun ẹsa nọ bia d'a sị m, “Bia, m k'a ghoṣi i onye hụ ya lẹ Nwa-ebulu hụ jenkọ d'a gba ehuhụ, nwunye Nwa-ebulu hụ.”

10 O nọ buru m ime-mmọn shi enu ugu ohu, oken-ugu, hụn jẹn elu oḍa-oḍa; o nọ ghoṣi m obodo-nso hụ wu Jerusalem k'o gha elu-igwee hidanla, Osolobue zihẹ ẹ.

11 Ogho Osolobue ri a ehụ, o hụ e be nwanran-nwanran ke ihien-mma ndi ahun a kokenmeni, leke akpuru Jasper; o hụ e nwun zai.

12 Mgbon ẹ hi-ogbe, jẹn elu oḍa-oḍa. Onu-mgbon mmebuo k'o nwe; mmọn-ozì ohu-ohu turusonme onu-mgbon ndi hụ. Wẹ deye efan ikpunulo mmebuo ri Izrelu ohu-ohu onu-mgbon ndi hụ.

13 Onu-mgbon eto-eto risonme ẹ ebamìn eno—eto ri ibeka owuwa-anya-anwun, eto ri ibeka ugu, eto ri ibeka ndidan-mirin, eto ri ibeka ndidan ẹnya-anwun.

14 Mgbon ani hụ nwon omuma mmebuo gin'e noke iyeto. Wẹ deyesonme efan ndi-ozì pu-ichen mmebuo Nwa-ebulu hụ enu wẹ.

15 Mmọn-ozì hụ gwa m oku gi mkpinsin goru wẹ gi a ma ihien, hụn o k'e gi ma obodo hụ lẹ onu-mgbon ndi rin'a lẹ mgbon ẹ.

16 Obodo hụ nwe azuun eno. Azuun eno ahun wuchanrin ahanmahan—ya wu, k'o suehan k'o shiahan.

O nọ gi mkpinsin a ma obodo hụ. *stadion* nnu-uku mmebuo ro (ya wu ihien noke maili ogun-mmitenei kwasị nnu-eto). K'o suehan lẹ k'o shiahan lẹ k'o jẹhan elu wuchanrin ahanmahan.

17 O nozi ma ke mgbon ẹ shiahan: gha mkpo-eka d'e ru onunu-eka mmebuo-uzo-mmebuo (kubiti eno

kwasi ogun-esa) k'ọ wu—ke ihian don a ma ihien. Ihien mmọn-ozì hụ gi ma a hanhụ ke hụn ihian gi a ma ihien.

18 Omuma a kọnì w'a kpọ Jaspà ke wẹ gi tụn mgbọn hụ; goru wẹ gwagbamalenì ya lẹ ihien ọwụlẹ ke wẹ gi tụn obodo hụ; o nwun zai ke ughegbe.

19 Wẹ gi ụdì ihien-mma ile rị ichen-ichen rị mkpa chosonmẹ omuma ndì hụ gi mgbọn hụ nọkẹ iyeto mma. Nke ibuzọ wụ Jaspà; hụn mẹ ẹ ebuọ wụ Safẹ; hụn mẹ wẹ etọ wụ ageti. Hụn mẹ wẹ enọ wụ ẹmaradi;

20 hụn mẹ wẹ isen wụ onisi; hụn mẹ wẹ isin wụ kaneliani. Hụn mẹ wẹ ẹsa wụ kraisolaiti; hụn mẹ wẹ ẹsatọ wụ berilụ; hụn mẹ wẹ itenei wụ topazi. Hụn mẹ wẹ iri wụ kraısopresi; hụn mẹ wẹ mmanai wụ jasinti; hụn mẹ wẹ mmebuọ wụ ametisi.

21 Omuma pu-ichen a kọnì hụn wẹ gi tusunmẹ onu-mgbọn mmebuọ hụ risonmẹ ụdì ichen-ichen. Onu-mgbọn ọwụlẹ ime wẹ wụ ogbe omuma pu-ichen ohu—omuma ndì hụ w'a chọ achọ wẹ gi a chọ ihien mma. Goru wẹ gwaleni ke wẹ gi mēmẹ ụzọ ụwayakanì hụn rị ime obodo hụ: o nwunchanrìn zai ke ughegbe!

22 Ahunnì m unọ-nsọ ọwụlẹ ime obodo hụ—makeni Osolobue hụn wụ Di-nwonnì-enyi, Onye hụn nwọn iken ile, lẹ Nwa-ebulu hụ wụ Ụlọ-nsọ obodo hụ.

23 Obodo hụ achọdeni enya-anwun mọbu ifon hụn k'e ye ẹ ukpe, makeni ogho Osolobue wụ ukpe ẹ, Nwa-ebulu hụ wụ ukpe-eka a.

24 Ukpe obodo hụ ke ndì anì ichen-ichen k'e gi bi. Ndì-nze ụwa k'e webanhan ogho wẹ ime Obodo hụ.

²⁵ Agunmakọ wẹ ọnu-mgbon obodo hu ebe eki ri elu, bu uhinhin ariko ebehu. Ya wu, agunmakọ w'a ke uhuhin han.

²⁶ Wẹ k'e webanhan ogho ali ichen-ichen le aku-le-uba wẹ ime e.

²⁷ Kani, o nwonni ihien owule rileni ochan mobu onye owule hun e me ihien runi enya Osolobue mobu ihien owule ya le ntụ wị k'a banyen'e. Ndi wẹ de efan wẹ ime ekukwo nke ndun Nwa-ebulu hu, uwe sọ k'a banye e.

Isi Nke Ebuo-kwasị-ogun

Iyi Hu Hun Mirin E E Ye Ndun

¹ Mmon-ozị hu nọ ghosị m iyi ahun mirin e e ye ndun; o gha ukpo Osolobue le Nwa-ebulu hu hula; o nwun zai ke ughegbe.

² O huko ahanmahan uzọ uwaya-kani ri ime obodo hu. Osisi ahun hun e ye ndun risonme iyi hu azunni le azunni. Osisi hu a mi udi mkpuru mmebuo ahua. Ifon-ifon ke o gi a mi mkpuru. Wẹ gi ehuhuo a a zuo ndi ani ile oia.

³ Ahunkozị wẹ ihien wẹ bu onu. Kama, ukpo-eze Osolobue le Nwa-ebulu hu k'a ri ime e, ndi-idibo e k'a ri e fe e.

⁴ Wẹ k'a gha a hun ihun e; efan a k'a ri wẹ ezimezi-ihun.

⁵ Ohii agbakozị; achokozị wẹ ukpe-eka mobu ukpe enya-anwun w'e gi legha uzọ, makeni Osolobue hun wu Di-nwonni-enyi jenkọ d'a wu ukpe wẹ. Wẹ k'a ki jennin ejen.

Obibia Jesu

⁶ Mmọn-ozị hụ nọ sị m, “Oku ndịni wu ezioku, wẹ furu w'e gi dọn ẹnya—makeni Onye-nwonnienyi, Chuku hụn a gwa mmọn rị ime ndi-amuma ihien hụ ndi-amuma e ku, iya zihę nwan mmọn-ozị ẹ d'a ghosị ndi-idibo ẹ ihien ndi hụn o meni wẹ k'e meriri ẹgwa.”

⁷ Jesu sị,
“Lee ẹ, m lala ẹgwa!
Ngozị rini onye k'e mę
ihien amuma rị ime ehuhuoni ku!”

⁸ Mmę wu Jonu, mme gi ntin m nu ihien ndini, gi ẹnya hụn wẹ. Ogen m gi nuguu wẹ, hunguu wẹ, m nọ dani mmọn-ozị hụ ghosị ni m wẹ ali—ni m fe ẹ.

⁹ Kani o sị m, “Emekwọle a! M wu odibo ibe i—iyu le umune i ndi-amuma le ndi hụn e mesonme ihien ndi hụ ehuhuoni ku. Fee Osolobue!”

¹⁰ O nọzi sị m, “Ezumele ihien ndi wẹ ku ime amuma rị ehuhuoni, makeni, ogen wẹ k'e gi mę rị nsue.

¹¹ Onye e mę njo ya mesonme; onye e bi obibi ru unyin ya bisonme; onye rị ochan ya risonme; onye rị nsọ ya risonme.”

¹² Jesu sị, “Gon ni ntin, m lala ẹgwa! Ugwo-orun m jenko a ku rị m ẹka. M k'a ku onye owule ugwo k'o dọn run.

¹³ Mmę wu Afa le Omega, Ibuzo le Ikpazuun, Mbidon le Ogugu.”

¹⁴ Ngozị rini ndi hụ k'a sụ ẹkwa wẹ, keni wẹ ni wẹ d'e ri mkpuru osisi ahun e ye ndun, keni wẹ ni wẹ gha onu-mgbon hụ banye ime obodo hụ.

¹⁵ *Makeni*, ndi hụ e bi ke nkite, ndi a rua-mmọn, ndi e bu nshi le ndi gi iken eje-mmọn a run, ndi-ughere, ndi-izighe, ndi a rua mmọn le onye owule

ntu a suo le onye owule e me ihien ya le ntu wi abanyeko obodo hu.

¹⁶ “Mme wu Jesu zi mmon-ozu m ozini d'e zi unu, keni o rusonme uka ichen-ichen aka. Mme wu mkpogun ahun Defidi gha suepuha; m ghazikwo ehun Defidi puha. Mme wu kokise utuntun hu hun e keni.”

¹⁷ Mmon-nsọ le okpoho hu 'ya le Jesu jenkọ d'a gba ehuhuo ri a si,

“Bia!”

Onye owule hun nuni ya siri,

“Bia!”

Onye owule egun-mirin ri a gun ya bia! Onye owule choni, ya weri mirin hun e ye ndun, ya weri e ofe ra.

Eka-ntin!

¹⁸ M ri a gwakwo onye owule nu ihien ndi we ku ime amuma ri ekukwoni ni onye owule becheni ni we, Osolobue k'e beche n'e afunfun ndi hu we ku oku we ime ehuhoni;

¹⁹ onye owule wepu ihien ime we, Osolobue k'e wefu ihien run'e ime osisi hu e ye ndun le obodo-nsọ hu we kusonme oku we ime ehuhoni.

Mmekin

²⁰ Onye hun ku ihien ndini, hun gi we shia eri, si,
“Eghe, m lala egwa!”

Isee! Onye-nwonna-enyi wu Jesu, bia!

²¹ Efo ma Onye-nwonna-enyi wu Jesu ya rini ihian ile.

**Elu Ọhụn: Ekwkwọ-Nsọ (Azụn Ọhụn rịn'a)
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

31b0248e-272a-5dee-8226-bcc00c54d9b1